

- Bus ples nidim moa mani: Mona - p2
- Ol yut long Erima kisim skul - p4
- Maining bai pinis tasol egrikalsa bai stap - p20



**Tablebirds**  
NO. 1 KAKARUK BILONG YUMI!

**Tablebirds FARM FRESH**  
real fresh chicken!

**proudly PNG MADE**

**BAIM PNG MADE NA KAMAPIM MOA WOK**

## 10 pesen bilong nupela meri sumatin bilong UPNG save kisim bel

Kolopu Waima i raitim

OLGETA yia, ten pesen bilong ol nupela meri sumatin bilong Yunivesiti ov Papua Niugini (UPNG) isave kisimbel bipo ol i pinisim yunivesiti.

Kaunsil memba bilong UPNG-Jerry Wemin i bin tokaut long orientesen bilong ol nupela studen long las wik Fonde.

Mista Wemin i tok long rekot bilong yunivesiti i soim olsem 10 pesen bilong ol meri sumatin i save kisim belnai no pinisim gut skul bilong ol.

Em i tok em i mas tok save long ol nupela sumatin bikos ol i mas save na noken pundaun long ol kain pasin we bai i no inap long helpim ol long skul wok bilong ol.

Mista Wemin i tok moa olsem, long 1000 nupela studen i rejista long UPNG dispela yia, nasapos ol i no lukautim ol yet, bai ol i kam go insait long dispela grup.

"Sapos yupela i no lukautim yupela yet em 10 pesen bilong yupela bai i kisim bel long 2018. Ol mangi bai kamap papa na meri bai kamap mama,"em i tok.

Mista Wemin i askim ol sumatin, long wanem as stret ol i save kam long yunivesiti.

"Yupela i kam long kamap papa na mama hariap o long kisim gutpela save na gutpela laip bihain taim?" Mista Wemin i askim.

Wanpela papa na komyuniti lida, Benny Bilas, i tok ol i gat strongpela bilip long pikinini bilong ol olsem ol bai skul gut na kisim save na stap gut long bihain taim bilong ol. Tasol ol i save kisim kain hevi olsemi mekim ol lain husat save sapotim ol tu i karim sem.

"Mipela no amamas long dispela pasin. Mipela save bungim mani na baim skul fi bilong ol. Sampela papamama i save wok long gaden, stap long ples na salim ol liklik kaikai na bungim mani bilong ol.

Ol sumatin i no ken paul nabaut. Karim pikinini bai no inap pinis. Ol i mas pinisim skul bilong ol pastaim," Mista Bilas i tok.

## 3-pela papa bilong bipo...



Ol tripela papa bilong kantri. Sir Michael Somare, Sir Peter Lus-olpela memba bilong Maprik na pastaim memba bilong Markham Andrew Baing i bung long palamen long Tunde dispela wik. Tupela pastaim memba i kam raun na laik lukim namba wan sindaun bilong palamen long 2014. Ol i bung insait long haus tambaran na holim han go insait.

Poto: Nicky Bernard

# Inkwairi ripot i no wok: Oposisen

Stanley Nondol i raitim

OPOSISEN i singaut long O'Neill gavman long yusim ol Komisin ov inkwairi (COI) ripot bilong, Odita Jenerel, Obusmen Komnisin (OC), Pablik Akaunt Komiti (PAC) na Nesanel Providen Fan(NPF) Fainens

Inkwairi na ol ripot bilong ol arapela wok painim long lo i ken mekim save long husat stilim pablik mani.

Oposisen lida Belden Namah na deputi oposien lida Sam Basil i makim maus bilong 6-pela memba bilong oposisen i

tok bikipela mani bilong stet i lus long pasin korapsen long planti yia na lo i mas mekim save long ol stil lain.

Oposien i mekim dispela singaut bihain long Praim Ministai tokaut long Lidasip Samit long Pot

Mosbi long dispela wik olsem long K40 bilien bilong pablik mani i lus namel long (State Own Enterprise) o bisnis bilong gavman.

Oposisen i tok gavman i yusim bikipela milien kina bilong pablik long mekim

planti wok painim long korap pasin na bikipela mani bilong kantri i lus tasol ol dispela ripot i no karim kaikai o das i karamapim i stap long gavman opis.

I go moa long pes 2



**Painim CASH MONI bilong yu insait long Botol Oil**

"Painim CASH MONI insait long ol GLOBE na SITA Kukkin Oil Botol"

**Na kamap Wanpela LAKI WINA NAU!**

Sapos yu painim displa ol CASH Moni:

K1000	K500	K100
K1,000	K500	K100
K50	K10	SITA 250ml
K50	K10	Fi SITA 250 ml Botol

**Hariap!!! Baim ol GLOBE na SITA Kukkin oil bilong yu NAU**

"Insait long lid" bihain yu rausim sil. Go kisim CASH MONI bilong yu long Globe dealer or kolim **Globe Hotline 422 3666**

Promosen bai pinis long 31st December 2013

Tupela kinas long PNG

# Bus ples nidim moa mani

## Kolopu Waima i raitim

**MEMBA** bilong Goilala Daniel Mona i tok ol distrik i stap longwe long taun na siti i nidim planti mani long givim sevis sapos yumi skelim wantaim ol distrik i stap klostu long rot, taun na siti.

Mista Mona i tok ol memba i kisim K10 milien na ol presiden i kisim K500, 000 long wan wan yia. Tasol dispela mani em liklik tumas long ol distrik stap long bus.

Emi mekim dispela toktok long taim bilong sainim Patnasip agri-men namel long Dipatmen bilong-Provinsal na Lokal Gavman Afes(DPLGA) na Sentral Provins Edministresen long givim sevis long bus ples long Kwikila stesin

las wik Fraide.

Mista Mona i tok ol memba bilong Palamen i save kisim wankainmani olsem K10 milien tasol ol memba distrik bilong ol i stap long bus, bai mekim liklik wok. Long wanem, olgeta mani save go long baim ol samting na nogat mani long kirapim wok developmen long distrik.

“Kos bilong karim ol samting go long kar na balus i antap tumas. Mipela i save westim planti mani long ol dispela kos.

Na liklik mani stret lep long pinisim ol wok developmen long distrik,” Mista Mona i tok.

Em i tok, gavman inap long lukluk long dispela na givim moa mani long ol distrik save stap long ol bus ples.



Daniel Mona i toktok long KwikilaStesin. Poto Kolopu Waima

## Strongpela meri lida i dai ...Salens long ol meri i go het long wok



Schola Kakas sanap autsait long palamen wantaim ol meri long taim palamen i givim tok orait long makim maus meri i go long palamen.

### Veronica Hatutasi i raitim

“STRONGPELA meri lida husat i pait strong long rait, ikwaliti, gutpela sindaun na praim minista bilong ol meri”em sampela toktok ol bikman na meri i bin mekim long funerel sevis bilong Scholar Warai Kakas long Pot Mosbi long dispela wik.

Mis Kakas i gat 53 krismas na em i bilong Enga provins. Em i bin dai las wik bihain long em i sik long sotpela taim tasol.

Sen Joseph’s Katolik Sios long Boroko, NCD i bin pulap long ol meri bilong nesenel, provinsal, sios na komyuniti lida, na ol meri long gavman, pablik na praivet sekta, ol NGO na sios. I bin gat ol bik-

man ol gavman minista, ol het bilong diplometik misin, ol dona patna i bung long selebretim laip na wok bilong Mis Kakas na tok gutbai long en.

“Bung bilong yumi hia tude i mekim yumi tingting long laip binnerel long yumi long ples daun, na long selebretim laip bilong Scholar Kakas.

“Taim yumi glasim na tingim em, Scholar, i bin gat bilip long ol samting em i save mekim long wok bilong ol meri.

“Em i “maus” husat i skruim wok long tok na pait strong long rait, bel isi, na luksave bilong ol meri. Em i bungim sapot long kisim ol samting em i bilip long en na moa yet, long luksave long ol meri PNG, i go long

gavman, na ol lain i go pas long ol komyuniti na ples na ol sios.

“Em i kamap olsem spirit bilong yuniti, hop na bilip na sanap strong long lukautim dispela bikos em i luksave long ol pen na hevi ol meri i bungim.

“Scholar i wokim bikpela sakrifais bikos em bin gat bikpela visen o driman bilong ol meri long laip na sindaun bilong. Em i no pret long autim tingting bilong em,” Asbisop John Ribat bilong Pot Mosbi Katolik Asdaiosis husat i bin go pas long funerel sevis i tok.

Em i bin askim ol meri long wok bung wantaim na skruim ol wok Mis Kakas i bin mekim long pait strong long ol meri PNG i ken gat jastis, ikwaliti na luksave.

## Gavman bai senisim Maining Ekt

### Stanley NONDOL i raitim

PALAMEN bai kamapim sampela senis long Maining Ekt long givim bikpela luksave long papagraun na gavman na dispela bai kamap long 2014.

Minista Bilong maining Byron Chan i tok taim senis na rivi long bilong maining ekt bilong 1992 i kamap bai apim ekuti bilong papagarun na provinsel gavman long 2.5 pesen i go antap long 5 pesen.

Dispela senis bai apim ekuti bilong gavman i go antap long 30 opesen long olgeta maining developmen long kantri.

Long dispela lo, lokol o papagraun bai kisim 50

pesen. Na 30 pesen em bilong gavman na 20 pesen bai go long ol papagraun long ol bisnis sapot.

Minista Chan i tok 70 pesen bilong ol minerels bilong PNG main i mas go long duan prosesing na sapos i gat ol refinari na mitim wol klas.

Minista Chan i tok aninit long nupela lo, kampani husat i mekim bisnis bilong main i mas givim ripot long gavman long rot bilong putim pipia na kisim tok orait na bihain bai mekim maining bisnis.

Mista Chan i tok 10 pesen bilong winimani bai gavman i putim long wok bilong ol meri na pikinini long kantri.

Minista Chan i tok dis-

pela rivi long wok long kamap yet na bai pinis long namba wan kwata bilong 2014.

Minista Chan i tok ol lain long MOA bilong main bai kamapim wan wan bikpela projek long helpim ol yet. Dispela bai kamap long ol papagraun bilong main tasol.

Minista Chan i tokim palamen olsem Flai-in – Flaiout bai nogat aninit long nupela lo. Em i tok olgeta wok man bilong main bai i gat famili i stap long maining taun long kantri.

Minista Chan i tok gavman i lukluk long givim 51 pesen bilong wok mani i go long papagraun na developa 49 pesen.

Minista Chan i tok

Maining Sefti Ekt na Mineral Risos Atoriti Ekt tu i stap long rivi long dispela bai helpim ol papagraun, stet, na ol developa long kisim gutpela sevis long wok main.

Minista Chan i tok maining sekta i pulim bikpela winimani i kam long baset bilong kantri na winim ol arapela sekta.

Em i tok planti mani long kantri i gat planti hevi na gavman i wok hat tru long daunim tasol i kisim longpela taim.

Em i tok dispela nupela lo bai helpim long daunim ol hevi na bikpela lukluk i stap long papagraun bai kisim bikpela sevis long maining long graun bilong ol.

## Inkwairi ripot i no wok: Oposisen

### I kam long pes 1

Mista Basil i tok, kantri i lusim bikpela bilien kina long pasin korapsen long planti yia anit long lidasip bilong ol praim minista bipo. Mista Basil i tok olpraim minista bipo i nau stap insait long gavman bilong Praim Minista Peter O’Neill.

Mista Basil i singaut long Mista O’Neill, nesenel gavman na konstitusenel na pablik opis long tokim pablik wanem samting i kamap nau long ol ripot bilong inkwairi kamap namel long 1975 i kam inap long 2013.

Oposisen lida Belden Namah, i tok Mista O’Neill i mas sanap long toktok bilong em long pait agensim korapsen na i mas yusim ol ripot bilong inkwairi long lo i ken mekim

save long lain paulim pablik mani.

Mista Namah i tok politikel apoinmen bilong bod na menesmen i bagarapim ol bisnis bilong gavman. Mista Namah i tok gavman i makim ol wantok, na man i nogat inap save long menesim bikpela bisnis na taim ol i no menesim gut, gavman bilong de i save tok bisnis i no mekim mani na salim long praivet kampani.

Mista O’Neill i singaut long Praim Minista O’Neill long noken salim bisnis bilong gavman long praivet kampani.

Em i tok maski i gat salens long bisnis olsem Air Niugini na Telikom, ol bisnis bilong gavman i mekim winimani yet.

Mista Namah i tok gavman i mas stretim straksa bilong makim bod na menesmen na sekim na kontrolim operesen bilong bisnis.

Em i tok gavman i noken sutim tok long bisnis i no mekim mani na salim.

Oposisen i tok ol i rait i go long Komisina bilong Polis na Obudsmen Komisin long mekim sampela samting o yusim ol dsipela ripot tasol ol i no kisim wanpela bekim na i wet yet.

Mista Namah, memba bilong Rabaul Dokta Allan Marat na Sam Basil i mekim ol dispela toktok asde taim Mista O’Neill i tok bikpela bilien mani i lus long bisnis bilong gavman.

# Buai tambu i stap yet

## Kolopu Waima i raitim

Tambu long salim buai long Mosbi siti i stap yet.

Gavana bilong Nesenel Kapital Distrik Powes Parkop i tok lo em menesemen bilong NCDC ii mekim long stopim buai i stap yet. Ol lain i ting olsem ol i karim buai kam insait long kainkain rot na hait nabaut na salim i ting olsem NCD i lus tingting long stapim buai, nogat.

Em i tok em bai no inap long senis tingting bikos i gat planti ol gutpela developmen kamap long siti napipia bilong buai i mekim ples i luk nogat.

Mista Parkop; "i tok planti salens na hevi i bin kamap tasol mipela kontrolim bikos em i nupela lo na bikpela samting we NCDC i wok long mekim.

Em i tok toktok long pasim buai long siti bai stap yet na ol lain husat i salim buai i mas traime long wokbung na lukluk long ol senis i kamap.

Em tok, ol i save sampela man husat i save salim buai i hait na karim i kam insait

long siti. Mista Parkop i tok sampela i katim wara Laloki na kisim i kam olsem long Morata One foa siti o swamp, sampela i kam out long 8 Mile, sampela i go antap long Goldie na katim kam olsem long 9 Mail. Dispela ol lain i painim dai bilong ol.

Gavana Parkop i tok ol lain i wok long karim buai kam yet tasol ol bai salim we. Ol polis bai helpim ol wokman bilong NCDC na raun na sekap. Ol bai i no gat rot long salim. Na ol bai westim mani bilong ol bikos no gat maket long siti we ol bai salim na kisim mani.

Em i tok ol i gat plan bilong buai na ol lain i mas bihainim lo NCDC i putim. Sapos ol i bihainim, ol bai i amamas long maketim buai bilong ol.

Gavana i tok ol buai lain husat laik salim buai i ken go long Laloki maket.

"Go baim beg buai long Roburokona kam salim lus wan long Laloki maket. Em ol maket we NCDC i tok orait long makim buai," em i tok.



Gavana Parkop i tok ol lain i wok long karim buai kam yet tasol ol bai salim we. Ol polis bai helpim ol wokman bilong NCDC na raun na sekap. Ol bai i no gat rot long salim. Na ol bai westim mani bilong ol bikos no gat maket long siti we ol bai salim na kisim mani.

Poto: Nicky Bernard

## Edukesen na saiens bai inap stopim bilip long posin na sanguma

BILIP long pawa bilong poisin na sanguma i strong yet long ol pipel bilong Papua Niugini.

Long taim wangepa man o meri i sik o i dai, bai komyuniti i sutim tok long narapela man o meri i wokim posin na kilim em. Na i no ol manmeri nating bilong ples tasol i bilip long dispela pasin.

Ol savemanmeri husat i holim ol bikpela wok long gavman, sios, kampani o komyuniti tu i bilip long pawa bilong posin.

Na ol sios i mekim wanem long senisim tingting bilong ol pipel long dispela bilip?

Dispela em i wangepa bikpela askim sampela Katolik ripota bilong niuspepa na redio na ol arapela woklain na ol studen i bin skelim long wangepa bung bilong tingim pestode bilong Santu Francis de Sales, was santu bilong ol lain i save raitim stori na ol ripota long Janueri 24.

Komisin Sosel Komyunikesen bilong Katolik Bisop Konprens bilong Papua Niugini na Solomon Ailan i bin stretim program bilong dispela bung long Emmaus Konprens Senta long Don Bosco Institut long Boroko.

Pater Franco Zocca SVD bilong Melnesian Institut long Goroka i bin go pas long toktok na givim sam-

pela eksampel long ol wokpainimaut em i bin mekim long PNG.


Namel long 2003 na 2007 Fr Zocca i bin go pas long wangepa tim bilong Melanesian Institut (MIRT) long mekim wangepa wok painimaut long bilip bilong posin na sanguma long Papua Niugini.

Ol i raun long 7-pela tokples grup, Simbu, Arapesh, Kote, Mekeo, Roro, Iduna na Tolai na kisim stori bilong ol pipel long dispela pasin bilong bilip long posin na sanguma.

MIRT i bin askim tu ol Katolik pris na ol arapela sios lida long tingting bilong ol long bilip bilong posin na sanguma long PNG, na wanem samting sios inap mekim long stapim pasin bilong kilim man o meri ol pipel i bilip i wokim posin.

Melanesian Institutu i raitim ol buk bihain long dispela wok painimaut long bilip bilong posin na sanguma long Papua Niugini.

I gat planti toktok i kamap long ol sios lida long painim rot bilong mekim ol pipel i luksave olsem posin na sanguma i no inap kilim man.



**SOLVE**  
your worry


**GROW**  
your money

## Savings Secured Loan

Do you have savings but need additional funds? With our Savings Secured Loan you can now take out a loan by using your savings account balance as collateral. Rates are competitive and you continue earning higher interest on your savings at the same time.

**BOROKO LENDING OFFICE  
WILL BE OPEN THIS WEEKEND  
SATURDAY 8th - SUNDAY 9th  
FEBRUARY 2014  
9AM - 4PM**

- ✓ Personal Loan
- ✓ Savings Secured loan
- ✓ Smart Business Loan
- ✓ Housing Loan



Official Sponsor of the 2015 Pacific Games

Apply now at your nearest branch

320 1212 / 7030 1212 - 24/7

servicebsp@bsp.com.pg

www.bsp.com.pg

# Ol Yut bilong Erima kisim skul

LONG Fraide apinun insait long wik i go pinis, ol Yut bilong Sen Peter Peris long Erima NCD, i bin go long Sivarai Namona Pastoral Senta, Bomana, long kisim sampela skul long wanem as tru bilong nem Yut.

Dispela wokabout tu bilong ol Yut i bringim planti salens na arapela samting olsem long wanem as tru long wok bilong yut grup long paris na wan wan Besik Kristen Komyuniti, wanem ol samting yut bai mekim bihain na tu save long wanem ol gol bilong ol long laip olsem Yut.

Meri i go pas long dispela bung em Sista Rebecca Fernandez (Kodineta bilong ol Yut long Asdais bilong Pot Mosbi) i askim sampela askim. Wapela em i olsem;

Wanem as bilong dispela wokabout bilong yupela na wanem tingting bilong yupela long dispela bung? Sampela i bekim olsem;

Ol i kam long save long wapela na narapela manmeri long kamapim na strongim dispela frensip wantaim God.

## Empawarim spiritual laip bilong ol

Lainim nupela samting long wan-

pela narapela na mekim laik pasin bilong Bikpela o God wantaim ol arapela yut i kamap bikpela.

Olsem tasol, Sista Rebecca wantaim Sista Imelda long taim bilong dispela bung i skulim o lainim ol yut planti samting olsem, wanem mining na as bilong yut grup, ol 4-pela eria bilong fomesen, ol lening meteriel, Katolik Yut Ministri Polisi, wanem ol gol bilong Peris Yut Grup, ol sakramen na Sakramental, konsen bilong Peris, Rol na lidasip wok wantaim introdaksen long Buk Baibel.

Planti samting i kamap long dispela taim, sampela i nupela we nau ol yut o yangpela i save olsem wanem na wok bilong ol long Peris i impoten na long wanem na paris i nidim Paris Yut Grup.

Sista Rebecca i tok, patisipesen o wok bung wantaim em i bikpela samting long strongim Yut ministri na sios wantaim.

Wankain tu Sista Imelda i skruim tok na i tok sapos i no gat yut bilong peris bai i nogat sios, olsem tasol sapos nogat wokbung, no gat yut grup.

Olsem na em i salensim ol Yut long i mas strong long bilip bilong ol na wok bung wantaim.



Sampela yut i sanap na kisim poto bihain long ol i go lukim Santu Maria na pre Rosari long Sarere moning antap long maunten long Sivarai Namona Pastorel Senta. Poto: Sandra Amuru

# Atiyafa helpim pipel long Avani

## Sape Metta i raitim

PASIN bilong kros pait na birua namel long ol wanpinis bilong Avani long Kafetina LLG eria long Henganofi distrik, Isten Hailans em i no pinis. Dispela pasin i kamap yet na planti ol haus, kopi diwai, kaikai gaden na ol arapela kago i bagarap long dispela pasin birua.

Dispela pasin bilong pait i wok long kamap inap long krismas

long 2013. Long dispela taim tupela birua famili yet i wanbel na kamapim bel isi pasin we ol i tok ol i no laik dispela pasin bilong pait na birua.

Dispela bel isi pasin i winim stret na kirapim bel bilong memba bilong Henganofi Robert Atiyafa. Mista Atiyafa i kamap wantaim ol tul na ol samting bilong wokim haus na givim i go long ol pipel bilong Avani long las wik Tunde.

Long taim bilong givim ol dis-

pela ol samting, Mista Atiyafa i tok em i laik ol pipel i yusim ol dispela tul long sanapim gen ol haus i bin bagarap long taim bilong pait.

Mista Atiyafa i givim tu 4-pela beil seken han klos long tupela birua lain long skelim na yusim.

“Yupela lukim wanem samting i kamap long taim yupela i pait na birua i go i kam?”

Em i no kamapim wanpela gutpela samting. Na gavman i no sapotim ol pait na birua lain na

givim ol samting i go long ol. Tasol mi yet i pilim sori olsem na mi mas helpim yupela ol pipel bilong mi long gutpela pasin, long wanem, yupela mas kirapim na bringim bek laip na gutpela sindaun bilong yupela gen long ples,” Mista Atiyafa i tokim ol pipel.

Em i promis olsem bihain liklik em bai bringim ol kopi palpa masin na ol pam bilong pamim marasin long kilim dai ol gras nogut long kopi gaden.

# Ol Komyuniti kisim trening bilong kisim sevis

## Kolopu Waima i raitim

OL komyuniti long Rigo inlan na Kloudi Be lokal level gavman long Sentral provins nau ol yet bai kamapim sevis long komyuniti bilong ol yet.

Dipatmen bilong Provinsal na Lokal Gavman Afes (DPLGA) i givim givim tupela wik trening long ol 28 manmeri bilong KloudiBe naRigo inland long Kwikila stesin.

Ol dispela 28 manmeri i lainim long go pas long kamapim wok, mekim ol wok ples klia, wokbung wantaim meri, strongim tingting, askim gavman na arapela organaisesen long kisim helpim, em i isi tru na long lukautim sevis i stap longpela taim.

Deputi Seketeri bilong DPLGA Dickson Guina i tok dispela program “Komyuniti Driven Development” (CDD) i no wanpela nupela program. Em i stap long opis bilong DPLGAlong tripela yia.Em i tok ol i save askim ol gavman long sapotim dispela program we Wol Benki givim mani long karimaut. Tasol nogat wanpela gavman i tingting long sapotim i kam inap



OL 28 greduet soim setifiket bilong ol na kisim grup piksa wantaim tisa bilong ol. Poto Kolopu Waima

nau we O’Neill-Dion gavman i sapotim.

Em i tok tenk yu long gavman longsapotim dispela programlong helpim planti ol komyuniti.

Ol sevis ol bai karimaut bai givim tingting long gavman long mekim plen stat long ples na kam antap.

Mista Guina i tok ol ii traim dis-

pela program long tupela provins, Sentral na Westen.

Rigo, Kloudi Be, Tapini long Gollala na Kairuku, bilong Sentral na Kiunga rural long Not Flai distrik, Lake Murray long MidleFlai distrik, Orimo-Bituri long SautFlai distrik na Kiwai long SautFlai distrik bilong Westen provins.

Ol dispela pipel bai kamapim

sevis long helt, edukesen, ol komyuniti sevis na long lukautim ol sevis taim sevis i kam long ples.

Bipo long givim setifiket, DPLGA na Sentral provinsal edministresen i sainim patnasip agrimen we Sentral provinsal edministrataGei Raga i makim maus bilong Sentral provins na Deputi Seketeri bilong DPLGai makim DPLGA.

## Tisa spak i dai long Talidig

POLIS long Madang i wok long mekim wok painimaut bihain long indai bilong wanpela tisa long Talidig long not kos rot (NCR) long Madang provins.

Dispela tisa nem bilong em Junior Geneva i greduet long Madang Tisa Koles long 2012 na i bin go wok long Matoko praimeru skul long Raikos distrik long las yia, na bai go bek gen long dispela yia.

Wanpela famili bilong Geneva, Francis Fuliva i tok wanpela pren bilong Junior i bin kisim em long las wik Fonde, na ol i ran long kar i go olsem long Talidig.

Namel long rot bas ol i ron long em i bamim wanpela bas long Midiba maket. Kros i bin kamap wantaim bas draiva na ol pasindia long bas, na ol i tok long go stretim hevi long Talidig polis stesin long NCR.

Fuliva i tok olsem Junior wantaim pren bilong em i go pas na wet arere long wanpela olupela haus lotu inap bas ya i go kamap na stop sampela mita longwe long tupela.

Tasol long dispela taim wanpela yangpela man i kisim gan na sut long bas draiva na ol pasindia, na ol lain ya i ran i go olsem long Talidig polis stesen long givim ripot.

Tasol taim ol polis i kamap long ples we hevi i kamap, ol i painim oslem Junior i kisim bikpela bagarap na slip wantaim blut long gras i stap.

Polis i holimpas tupela man wantaim gan tasol bihain ol i larim ol i go.

Polis i mekim wok painimaut yet long ol lain husat i kamapim dai bilong Junior Geneva long holimpasim ol.

# Lo Sumatin givim awenes long Markham

WANPELA sumatin bilong Yunivesiti bilong PNG i bin mekim sampela awenes long sampela bikpela toktok long tupela wik taim em i bin stap long skul holide, long Het bilong wara Markham long Morobe Provins.

William Bussil Junior i bin bringim dispela awenes long ol pipel bilong Uffuaf na Gantisap na ol narapela ples klostu long het bilong bikpela Markham Wara long hap bilong Umi-atzera Lokal Level Gavman long Markham Veli.

Ol dispela ples i wok long lukim planti senis long sosel na ikononik na long akua-kalsa na sampela gutpela taim i save kamap long ol kakao na kopi wantaim pinat, melen, kawawar na ol pis long ol liklik wara bilong lukautim pis.

Taim em i bin stap long holide long ples bilong mama bilong em, William



**William Bassil Junior, i stadi long kamap loya long UPNG.**

Bussil Junior i kisim singaut i kam long kaunsila bilong Wod 20. Kaunsila i askim em long em i mas mekim sampela awenes long ol pipel long toktok bilong lo i karamapim ol liklik ol pasin bilong brukim lo bilong ol

viles kot, distrik kot na nesenel kot.

Ol lain bilong ples i laki long harim gut ol toktok bilong lo na askim kwesten long save moa. Ol i askim long ol tingting bilong gavman long senisim sampela hap bilong Viles Kot Ekt long mekim em i kamap moa isi long ol pipel. Em i toktok tu long sampela kain pasin bilong brukim lo we bai i kisim dai olsem mekim save; olsem pasin sanguma, pasin bilong bagarapim meri na pasin stil wantaim gan o samting bilong pait na kilim man.

Em i tok i gat wanpela gavman ejensi wantaim Lo Rifom Komisen bilong Mama Lo i kisim tok orait long gavman. Ol bai mekim wok na toksave long gavman long wanem kain rot bai ol i yusim long kilim man olsem mekim save bilong pasin bilong

brukim lo.

Em i holim tu ol liklik grup diskasen long ol ples wantaim ol lidaman bilong toktok long ol hevi bilong graun. Em i tokim ol long ol i ken askim ol Distrik Edministreta long helpim ol long stretim ol toktok bilong graun aninit long Len Dispiut Setelemen Ekt long stretim insait long kot.

Long namba tu wik, em i bin toktok wantaim ol yut long lukluk long laip na wanem kain hevi ol i save bringim long ol famili bilong ol na stretim pasin bilong ol. Em i toktok long pasin bilong slip wantaim man o meri pastaim long marit na i no save yusim ol samting bilong banisim ol yet. Em i tok moa long ol liklik meri i save kisim bel nating na long salim sik HIV na ol narapela sik i go i kam long taim ol i slip wantaim.

## Gutpela senis bai kamap long Duk ov Yok

**Michael Novingu i raitim**

OL pipel bilong Duk ov Yok ailan long Kokopo distrik bilong Is Niu Briten, bai lukim sampela senis i kamap long kamapim gutpela sindaun bilong ol long faivpela yia i kam.

Presiden bilong Duk ov Yok LLG Henry Libai i tok Kokopo Distrik Join Baset Praioriti Komiti i tok orait pinis long kamapim ol dispela projek long 5-pla yia i kam.

Mista Libai i tok klostu bai wok i stat long wokim wanpela ring rot i raunim ailan. Em i tok ol i putim pinis K3milien long mekim dispela wok.

Em i tok ol bai wokim tu wanpela bris long Kokopo we ol manmeri i ken kisim bot i go long ailan na we ol i ken putim bot bilong ol na bai gat wanpela haus malolo bilong ol tu. Em i tok mani mak bilong dispela tupela projek em inap long K1.5milien.

Libai i tok tu olsem

K200,000 i redi pinis long kirapim Ramoaina grot senta. Dispela senta bai stap namel long LLG we ol manmeri bai kam long mekim ol wok bisnis bilong ol.

Em i tok ol arapela projek em long wokim tupela K300,000 dabol klasrum long Butlivuan praimer sku, tupela haus slip bilong ol polisman long Kibil polis stesin long K280,000 na tripela haus slip bilong ol tisa long Ramoaina Teknikel sku long K200,000.

Libai i tok bai ol i baim wanpela nupela solwara ebulens K474, 000 long kisim ol sikmanmeri long ailan i go long haus sik long bikples.

Siaman bilong Kokopo Join Distrik Baset Praioriti Komiti, Ereman ToBaining Junia i givim tokorait long dispela projek i kamap insait long dispela faivpela yia.

Libai i tok tenkyu i go long O'Neill-Dion gavman long luksave long kraik bilong ol manmeri bilong Duk ov Yok ailan na givim mani long helpim sindaun bilong ol.

# Kain kain stail i no abrusim buai rot blok

**Alu Aluvula i raitim**

OL PASINDIA bilong Hiritano Haiwe na ol lain i save salim buai long NCD i wok long painim kain kain stail yet long haitim buai na karim i go long siti.

Tambu bilong buai long NCD i kamap long Oktoba 1, 2013, siti bilong Pot Mosbi i luk klin tumas na i no gat wanpela retpela mak bilong spet buai. I luk olsem ol lain bilong kaikai buai i wok long stap longwe long ol pablik ples olsem ol opis, soping senta, haus sik, skul na long ol bik rot.

Planti bilong ol lain i stap long siti i luk olsem ol i harim toktok na bihainim lo i tambu long kaikai buai na spet long pablik ples, tasol i gat sampela ol i no laik bihainim dispela lo.

Las wik ol NCD Risev Polis wantaim ol Siti Rensa i holim sampela lain long Laloki rot blok. Wanpela man i kam long retpela sedan kar em ol polis i painim buai insait long but bilong kar.

Ol polis i kisim ol buai na ol i hoim pas na lokim kar long wanpela de. Dispela draiva i rausin spea taia bilong em na i putim tupela 10 kg bek buai olsem taia. Ol polis i no sasim dispela man tasol ol i givim em strongpela tok lukaut long em i mas tok save long ol narapela lain long wanem kain hevi ol i ken kisim sapos ol i wok long brukim lo yet.

Narapela kar i karim sampela lain em wanpela waitpela nisen navara singel keb yutiliti, na olgeta lain insait long kar i karim wan wan

2kg plastik buai. Lo bilong NCD i tok wan wan man i ken baim 2 kg buai tasol na kisim i kam insait long Siti long Raburogo na Sabusa. Kain olsem 15 manmeri insait long kar i holim wan wan 2 kg plastik buai.

Ol polis tu i yusim het bilong ol. Taim ol i sekim gut dispela kar em ol i painim olsem i gat buai aninit long kar. Ol i putim ol buai insait long wanpela spea taia rim na pasim aninit long kar. Ol pasindia bilong kar i kirap nogut long ol siti rensa i daunim spea taia na lukim ol buai. Ol Siti Rensa i kisim ol dispela buai na olgeta lain long kar i stap long rot blok inap long dispela de i pinis.

Ol polisi holim tu narapela tupela meri i haitim ol buai insait long meri blaus na trausis bilong ol. Planti meri i wokabaut i go long ol dis-

pela maket i save putim 6 poket trausis i gat traipela poket we ol i save putim ol buai i go insait taim ol i kam bek long siti.

Tasol tupela meri i no laki tumas. Ol polis na ol siti rensa i luksave olsem tupela i groim sais bilong tupela hariap tru. Wanpela meri siti rensa i kam na sekim tupela mama ya na i painim ol buai insait long ol bikpela trausis poket. Namel long tupela ating tupela i karim buai inap long pulimapim wanpela 10kg bek.

Ol polis na ol siti rensa i wok long was yet long Laloko Rot blok 24 haua na ol i save sekim olgeta kar i go i kam.

I kam inap nau, ating ol NCD polis nau i kisim samting olsem 100 ton buai long ol rotblok stat long Januери i kam.



**Tupela meri i haitim buai insait long 6 poket trausis inap long skel bilong pulimapim wanpela 10kg bek.**

# NFA i gat nupela Dairekta

**Frieda Sila Kana i raitim**

NESENEL Fiseris Atoriti (NFA) i gat nupela menesing dairekta.

Gavman i senisim olpela hetman, Sylvester Pokajam na i makim John Kasu long kisim ples bilong em.

Mista Pokajam i bin stap moa long 10-pela yia olsem menesing dairekta bilong NFA na em i bin kirapim planti bikpela wok bilong Fiseris long kantri PNG, Pasifik, na long wol tu. Bikpela luksave bilong em i stap long ol wok bilong kisim na salim pis tuna long kantri na rijon.

Na em i gat planti tingting na plen i stap yet long skruim wok i go tasol em i kirap nogut long gavman i senisim em.

Minista bilong Fiseris, Mao Zeming, i bin stap long tok gutbai long olpela menesing dairekta na tok welkam long nupela Dairekta, John Kasu. Siaman bilong NFA bod, Job Pomat wantaim ol narapela bod

membra tu i bin stap long witesim dispela taim bilong senisim lida.

Fiseris Minista, Mao Zeming i tok, tenkyu long Mista Pokajam long em i bin putim nem bilong Papua Niugini i go long mep bilong wol long wok bilong pis tuna na fiseris.

"Olgeta lain bai wari tru long yu. Mi givim gutpela blesing long yu na famili bilong yu long bihainim." Mista Zeming i tok.

"Kongresulesen i go long John Kasu long kisim dispela wok. Mi traim long senisim tingting bilong gavman tasol ol i no harim mi. Olsem na mi lukluk go het long wok gut wantaim nupela Menesing Dairekta long helpim ol pipel bilong yumi," em i tok.

Job Pomat, Siaman bilong NFA na olpela Minista bilong Fiseri i tokaut olsem em i bin kirap nogut taim em i harim long dispela senis bai kamap. Em i traim long senisim tingting bilong gavman tasol i no inap.

## FARM TRACTORS

PORT MORESBY: 323 2658 | Digicel: 7215 0333 / 7217 9815  
 LAE: 472 6324 KOKOPO: 982 8748 | email: machinery@agmark.com.pg

# ELC Kote kisim plang bilong namba 30 Sinod

**Paulus Tali i raitim**

## FINSAFEN long Morobe Provins bai lukautim namba 30 bikpela Luteran Sios bung long 2016.

Long pinis bilong Luteran Sios sinod, ol lain Kote i bin amamas na singsing wantaim i go kisim hap plang long soim olsem ol bai lukautim bikpela Sinod bilong Evanjelikel Luteran Sios long 2016.

Dispela bikpela bung bilong olgeta Luteran insait long Papua Niugini bai kamap long Finsafen.

Olgeta deliget husat i bin kamap long namba 29 Sinod bilong sios long Karkar ailan i bin witnes long ol Kote i kisim dispela hap plang. Moa long 3,500 pipel i bin kamap long dispela Sinod.

Long taim bilong toktok, ol Kristen husat i kam long Morobe, Hailans, Papua distrik, Niugini ailan i bin toktok planti long bisnis han bilong sios, Luteran Siping.

Ol i tok dispela kampani mas kamapim gutpela wok bikos, em i bihainim wok misin bilong ol

pikinini Sande skul. Sios i bin baim ol sip bilong mekim ran bilong sapotim wok bilong autim Gutnius.

Ol i tok tude Luship i kamap olsem bisinis bilong wanpela man na i no bilong sios, we man i no gat pret moa long God.

Long dispela taim tu i bin gat toktok i kamap long Luteran Yunivesiti. Planti Kristen i tok pait long ol i wet bipo long yunivesiti i kamap.

Ol i tok ol lida i wok long tok pait i stap na i no tingim ol liklik man meri, we ol pikinini Luteran yet i laik kam skul long yunivesiti bilong sios yet.

Ol Kristen husat i kam long 16, distrik laik toktok moa long wok bilong Gutnius, na ol i tok ol wokman olsem pasto, evanjalis, wokmeri, hetman, yut, na Sande skul i mas sanap antap long Gutnius na strongim bilip bilong ol manmeri.

Ol i tok olsem ol sios lida bilong tude i no mas tingting tumas long mani na kago.



**NAMBA 30 SINOD PALANG:** Ol Kote Distrik Luteran Sios lida i amamas na kisim palang i makim 2016 sinod bai kamap long distrik bilong ol. *Poto: Paulus Tali*

# Bogia no gat plen long ol rot long distrik

OL PIPEL long Bogia distrik long Madang provins i no bin lukim wanpela bikpela developmen o impekt projek long strongim ekonomik developmen we bai kamapim gutpela laipstail bilong ol insait long las 15 yia.

Insait long wanpela ripot bilong Bogia distrik edministresen, distrik i no gat wanpela plen long karimaut wok bilong stretim ol rot insait long distrik we bai bungim na stretim 12-pela hanrot insait long Bogia.

Dispela ripot i soim olsem insait long las 15 yia, moa long 70,000 pipel insait long Bogia distrik, planti long ol dispela lain husat i save stap long ol eria we nogat wok i kamap long stretim ol han-rot i mekim tarangu ol pipel i kisim taim tru long bringim kaikai o ol kesthrop olsem kakao, kopi o kopra i go salim long taun bikos rot i bagarap stret.

Ripot i soim olsem insait long Bogia distrik klostu olgeta viles we i stap arere long ol bikpela rot- i gat

PMV trak, olsem na rot infrastraksa developmen insait long distrik i mas kisim moa luksave.

Ripot i tok tu olsem Bogia distrik i no bin kamapim wanpela gutpela kwaliti sevis wok kamap, na i no bin kisim wanpela impekt projek i kam long provinsal gavman o nesenel lida bilong ol long planti yia.

Ripot i soim tu olsem Bogia i kamapim gutpela plen long ol miting bilong Joint Distrik Plening na Baset Praioriti (JDPBP) olsem na

insait long las 10-pela yia i no gat gutpela rekot bilong miting i stap o gutpela tok orait we Bogia distrik edministresen i ken bihainim long mekim wok bilong en.

Ripot i soim tu olsem politikel edministresen aninit long lukaut bilong nesenel memba (MP) bilong Bogia i no gat 5 yia distrik developmen plen olsem dokumen o rot-mep we i ken gaidim o stiaim ol long bringim kwaliti developmen i go long ol pipel long kamapim gut-

pela kwaliti bilong laip.

Ripot i tok ol yangpela LLG presiden nau long Bogia distrik long Yawar, labu na Almami aninit long lidasip bilong MP John Hickey bai gat planti moa wok long wokim long dispela yia 2014.

Antap long dispela, Bogia distrik edministresen i mas lukluk moa long rot mentenens, rot infrastraksa na ol arapela sevis long helpim ol pipel.



**KASTOM I BIKPELA SAMTING:** Maining Minista Byron Chan i bin stap insait long deligesen bilong Praim Minista, Peter O'Neill, taim em i go long Bogenvil. Hia em i putim kastom klos na amamas long bungim Sif Dennis Sareke bilong Buka, Atonomas Rijon bilong Bogenvil. *Poto: Veronica Hatutasi*

## Goroka Teknikel Koles i lukim senis

**Sape Metta i raitim**

WANPELA olpela skul long Goroka, lsten Hailans i stat long lukim bikpela senis stat long las yia na bai i go het long dispela yia. Dispela skul em Goroka Teknikel Koles.

Hetmasta, Sogerifa Lutogo na namba tu bilong em Johnson Luhuwe i ken paitim bros na tok amamas olsem Goroka Teknikel Koles i lukim sampela senis i kamap nau bihain long skul i bin stap inap 58 yia.

Tupela man i tok planti ol olpela haus bilong koles i wok long bagarap na dispela ol nupela developmen bai senisim na givim gutpela pes long koles.

Mista Lutogo i tok, nau yet bihain long ol i kisim tu milien kina long yia i go pinis long nesenel gavman, ol i putim wan milien kina i go long apredim institusen. Ol i sanapim nu-

pela 4 in wan klasrum na ol arapela developmen projek olsem nupela haus slip bilongol meri studen na baim tu wanpela nupela trak bilong koles.

Em i tok amamas tu olsem, maski sapos koles i pasim 2013 skul yia, em i gat wan handet tausen kina i stap long benk akaun nau, na dispela mani bai helpim koles long statim wok long dispela yia long taim skul i stat gen long neks wik.

Mista Sogerifa i tok, koles i putim tu sampela mani long IBD, we bai helpim ol projek bilong koles long dispela yia.

Em i go moa na tok koles i ranim planti ol skil trening program long opis wok na edministresen na long teknikel sait tu, olsem na bai ol i go het long kisim ol sumatin nagivim trening long ol long kisim gutpela save long ol dispela wok.

## DWU tokim ol sumatin long no ken dring bia



**Ol sumatin bilong DWU i harim ol tok skul long orientesen las wik.**

**Isaac Liri i raitim**

DIVAIN Wod Yunivesiti (DWU) long Madang i statim orientesen bilong ol long las wik. Na wanpela bikpela samting edministresen bilong DWU i toktok long en, em long pasin bilong dring bia, spak, na mekim kain kain bikhet pasin insait long komyuniti.

Vais Presiden bilong DWU edministresen, Ted

Alau, i tokim ol sumatin las wik olsem DWU edministresen bai i no inap givim sans long ol sumatin husat i brukim skul rul.

Long las yia, DWU i bin rausim planti sumatin long pasin bilong dring na mekim kain kain bikhet pasin insait long yunivesiti. Mista Alau i tok em i no laik lukim ol sumatin i lusim skul bikos long pasin bilong

dring bia na bikhet nambaut.

DWU edministresen i gat disiplineri kaunsil, na dispela kaunsil i save go pas long lukluk na stretim ol sumatin husat i save brukim ol skul rul.

Mista Alau i tok olsem dispela pasin bilong dring bia na mekim kain kain bikhet pasin insait long skul i no gutpela. Em i tokim ol nupela sumatin olsem ol i kam

long skul, na papamama o husat i baim skul fi bilong ol i pilim bikpela pen long putim ol long skul.

Mista Alau i laikim ol sumatin long stap gut olsem ol yunivesiti sumatin na pinisim dispela skul yia wantaim gutpela risal.

Ol Klas long DWU bai stat long neks wik, na disiplineri kaunsil i no holim wanpela sumatin yet.

# Skruim kot iwestim taim bilong kot

## Kolopu Waima i raitim

### Pasin bilong skruim kot i go em i westim taim bilong kot

Waigani komital kot Mijistret Pindipia, i mekim dispela tok-tok taim ol lain kam long kot i no redi wantaim ol kot pepa bilong ol. Ol i askim kot long skruim taim go long narapela de.

Mejistret i bin kamapim dispela toktok taim stet prosekuta i no redi long wanpela kot we wanpela meri

i bin kilim idai narapela man na em i no kisim ol infomesen na redi long kot.

Mejistret i bin skruimtaim bilong dispela kot long las wiki kam long dispela wik long harim kot long Tunde. Tasol stet prosekuta i no redi long ol pepa na i askim kot gen long skruim i go long narapela de.

Prosekuta i tok wanpela polis man husat i bin kisim poto bilong dispela trabel i no stretim gut ol piksa bilong en.

Na tu, ol polis i no toktok na kisim wari bilong dispela meri husat i stap nau long kalabus.

Em i tok moa olsem, wanpela witnes tu ol i no painim yet long kisim moa stori long dai bilong dispela man.

Mejistret Pindipia i tok, em i wok bilong polis long wok hariap long stretim dispela hevi.

Em irausim ol narapela eskus na lukluk long witnes. "Ol narapela eskus em i no lukluk, long wanem yu

no givim gutpela ansa bilong wanem ol i no go kisim wari bilong em, na yu no tok klia bilong wanem polisman ya i no stretim poto.

Sampela masin bilong stretim poto i bagarap o, yu no tok klia long dispela," Mejistret Pindipia i tok.

Em i tok em i lukluk long wanpela poin em long hia witnes tasol.

Prosekuta laik askim kot long kisim narapela mun long stretim ol dispela pepa tasol Mijistret i givim wan wik tasol long painim witnes

naputimeplikesen long kot insait long tripela de.

Saspek meri i tok em i bin slip tripela mun long kalabus na askim kot sapos em i ken kam aut.

Mejistret i tok, "Mi lukluk long dispela sait tu na mi givim tripela de long prosekuta ken go painim dispela hia witnes na fail i kam bipo long 4:06 apinun long Fraide.

Dispela kot bai kamap gen neks wik Fraide.



Sajen Patrina Dikin i sekim ol ripot i karamapim wok long sefti bilong ol meri long maket ples wantaim tupela wok-man bilong Australia Federal polis.

Poto: Nicky Bernard

## Man katim meri bilong em

### Kolopu Waima i raitim

Tupela marit long Is Nu Briten Provins i kros na man i kisim wanpela longpela bus naip na katim han kais bilong meri bilong em.

Polis ripot i kam long opis bilong Deputy Polis Komisina i tok meri ya kisim bikpela bagarap na bun bilong em tu i bruk.

Ol i kisim i em i go long Nonga haus sik tasol em i dai sample de bihain. Ol polis i kisim dispela man na em i stap long Kokopo haus kalabus na wetim

kot. Meri dai i bilong ples Tauliu. Dispela trabel i bin kamap long mun Januери.

Long Mosbi, Foapela raskol i hensapim wanpela man long gan ol yet i wokim na kisim kar bilong em. Dispela trabel i bin kamap long Gerehu stage 3 long mun Januери. George Lau i tok em i draiv kam aut long haus bilong em long Gerehu na foapela raskol i makim em long gan na kisim kar bilong em. Em i tok kar bilong em, i waitpela, Toyota Harrier

Stesin Wagon, namba BED 221. Mani mak bilong dispela kar em K48, 000.

Samting olsem 8-pela raskol i yusim wanpela bikpela gan na hansapim Pennie Agrua na kisim deliveri kar bilong Brain Bell kampani wantaim ol kago.

Dispela kar em wanpela waitpela Daina namba bilong en BDM 853. Dispela trabel i bin kamap long 4 mail long las mun. Ol i ripot long polis tasol polis i no kisim wanpela man yet. Wok painimaut i go het.

## Papa i bagarapim pikinini meri

### Michael Novingu i raitim

Pasin bilong ol papa i repim na mekim pasin nogut long ol pikinini meri bilong ol yet i wok long kamap bikpela moa long Is Nu Briten provins.

Ekting polis bos long Is Nu Briten David Yapu i tok dispela pasin nogut i bringim nem nogut i kam long provins.

Mista Yapu i tok sapos ol kain hevi olsem i kamap, mobeta ol komyuniti i no ken stretim long ples na viles kot. Em i tok ol i mas

kam ripot long polis na bikpela kot i ken givim mekim save long ol papa husat i no save soim rispek long ol pikinini meri bilong ol.

Em i mekim dispela tok tok bihain long polis i sasim wanpela papa long ples Volavolo long Rabaul distrik long repim pikinini meri bilong em long Septemba las yia.

Polis ripot i tok soim pikinini meri i gat 21 kismas i slip i stap long rum bilong em na papa i spak pinis kam long haus na i go insait log rum bilong em na i repim

em. Polis ripot i tok papa ya i tokiim pikinini bilong em olsem bai em i kilim em sapos em i tokaut.

Tasol dispela pikinini meri i no pret na i go ripot long ol polis.

Yapu i tok tenkyu long Volavolo lo na oda komiti long wokbung wantaim polis long kisim dispela papa kam long polis long asua em i mekim long bagarapim pikinini meri bilong em.

Em i tok dispela hevi i bin kamap long Septemba 2013, tasol ol i putim ripot long mun Januери long dispela yia.

## Tisa les long tis mas lusim wok

### Kolopu Waima i raitim

OL TISA man mas kamap olsem dispela na go aut na skulim ol sumatin.

Deputi Siaman bilong Nesenel edukesen Bod (NEB) Titus Romano Hatagen i mekim dispela toktok long bung bilong olgeta tisa bilong ol kato-lik skul long St. Joseph Sios long Boroko.

Mista Hatagen i tok ol tisai mas laikim wok bilong ol na skulim ol sumatin long lewa bilong ol.

"Yu mas skulim ol sumatin long olgeta strong na save bilong yu. Na ol samting yu lainim ol i mas i kam long lewa

bilong yu," Mista Hatagen i tok.

Em i tok; "Long pinis bilong wan wan yia, yu bai amamas long wanem samting you skulim i mekim ol sumatin i kisim gutpela save."

Mista Hatagen i tok, sapos yu no amamas na yu pilim olsem yu no mekim gut long edukesen bilong ol sumatin, em yu i ken lusim tisa wok.

"Tisa husat i les long wok olsem tisa mas lusim wok. Sapos yu wok yet, em bai yu no inap long helpim ol sumatin. Em bai yu bagarapim sindaun bilong ol.

Em i tok ol tisai mas

soim gutpela pasin long ol sumatin bikos ol sumatin i save bihainim pasin bilong ol tisa.

"Yupela mas putim ol gutpela koles, kamap long klasrum olgeta taim stat long 8'klok na pinisim wok long taim stret. Sapos yu bikhet, ol sumatin tu bai bihainim yu na ol bai no inap lainim ol samting," Mista Hatagen i tok.

Em i askim ol nupela tisa husat i pinis long tisa koles i mas plenim ol wok bilong ol gut na skulim ol samting ol i lainim. Ol sumatin tu i laik long bihainim pasin bilong yupela bikos yupela i nupela long wokna ol sumatin bai laik long harim long yu.

**BACK 2 SCHOOL  
BACK 2 THEODIST  
25% OFF!**

**BACKPACKS, SACHELS, DUFFLE BAGS, LUNCHBOXES,  
DRINK BOTTLES, PENCIL CASE & MORE**



**smash REYEX EBOX**

**PROMOTION ENDS FEBRUARY 28TH!!**

**CALL OUR SALES TEAM TODAY!**

WAIGANI DRIVE PORT MORESBY  
Ph: 325 6500 Fax: 325 0302 Email: sales@theodist.com.pg  
MARKHAM ROAD, LAE CITY  
Ph: 472 5438 Fax: 325 0302 Email: sales@theodist.com.pg

**THEODIST LTD**  
THE STATIONERY SUPERMARKET

# Stadi gut long sotpela taim

## Kolopu Waima i raitim

**VAIS Sansela bilong Yunivesiti ov Papua Niugini Albert Mellam i tokim ol sumatin long pasim tingting long stadi na kisim gutpela save long sindaun gut long bihain taim.**

Em i mekim dispela toktok long orientisenbilong ol nupela studen long las wik Fonde.

Profesa Mellam i tok stap long yuni em sotpela taim. Sampela bai stap foa yia, sampela tupela yia. Ol sampela sumatin bai stap sikispela mun sapos ol i brukim lo bilong yunivesiti. Yunivesiti lo bai no inap isi long ol sumatin husat i biket long skul. Eksampel olsem no ken dring insait long banis bilong yunivesiti.

Profesa Mellam tok, "Yu kam hia long wanpela as, em long stadi, kisim save na stap gutpela man na meri bilong wokbung na

kirapim kantri long bihain taim."

Em i tokim ol sumatin long askim ol yet bilong wanem ol i stap long hia o long skul? Planti man meri i putim plantimani long skul bilong ol sumatin na ol sumatin i no ken pilai nabaut na mekim nabaut long skul.

Profesa Mellam i tok UPNG em wanpela skul we ol sumatin bai toktok fri wantaim ol narapela sumatin long skelim aidia na wokim gutpela pren long bihain taim, taim ol i go aut long wanwan wok bilong ol.

"Yu toktok wantaim ol narapela sumatin na lainim long ol tu. Tasol bikpela samting em yu mas putim olgeta tinting bilong yu long stadi, kisim gutpela mak na pinisim yia bilong yu. Yu man i gat plen long skul na laip bilong yu na kisim dispela long taim yu makim long en," Profesa Mellam i tok.



Ol nupela sumatin sekap long nem bilong ol long stretim skul fi long UPNG forum. Foto Kolopu Waima

# Sem na pret no ken kontrolim laip bilong yu long skul

## Kolopu Waima i Waima

**PRET, SEM,** les na tok gris bilong narapela sumatin i no ken kontrolim

laip bilong yu.

Kaunsil memba bilong Yunivesiti bilong Papua Niugini Jerry Wemin i tokim ol nupela sumatintaim ol i

bung long Fonde long wik i go pinis long yunivesiti bilong Papua Niugini.

Mista Wemin i tok pasin bilong

sem long askim kwesten, sem long lukim tisa, pilim olsem yu no fit long wokim ol wok bikos ol narapela i wokim gut na les long wokim ol skul wok bilong yu i no ken kontrolim laip bilong yu.

Ol dispela pasin tasol i save bagarapim skul wok bilong ol pikinini.

Em i tok; "Sanap strong na askim yu yet bilong wanem na yu kam stap long yuni?"

Mista Wemin i givim tingting na strongpela toktok long ol sumatin na tok yunivesiti i gat sistem bilong em yet long glasim skul wok long wan wan semista na sapos ol sumatin i no wok gut, sistem bai rausim ol long namba wan semista o long pinis bilong wanpela yia.

"Olsem na yupela i laki long kam long yuni. Mekim gut long skul, tok nogat long ol arapela samting we

bai no inap long sapotim yu long skul wok olsem go long ol "nait klap." Em bai no inap givim yu gutpela laip. Traim long daunim sistem na stap gut i go inap foapela yia na yu kisim pepa," Mista Wemin i tok.

Em i tok rekot bilong yunivesiti i tok planti ol namba wan yia sumatin meri i save karim pikinini long namba wan yia bilong ol long yunivesiti. Na planti ol mangi save kamap papa taim ol i skul yet.

Ol i save kisim kaikai long ples kaikai bilong ol sumatin na givim ol pikinini. Dispela pasin i noken kamap long dispela yia go pinis long skul bilong yupela.

"Wok bilong yupela em long stap olsem sumatin. I no papa o mama," Mista Wemin i tokim ol studen.

# Tried Pasifik bai givim aut skul saplai

## Kolopu Waima i raitim

**TRIED** Pasifik bai givimaut ol skul material bilong olgeta skul insait long kantri.

Dipatmen bilong Edukesen i bin putim pablik tenda na dispela kampani i bin winim long las yia.

Kampani i laikim na sainim pinis pepa wantaim LD Lojistik long helpim em long karim ol skul material na givim long ol wanwan skul long kantri.

Seketeri bilong Edukesen Michael Tapo i tok aut long dispela taim ol nius lain i askim long wanpela midia komprens.

Dokta Tapo i tok long taim kampani i givim ol samting, em bai sekim ol skul tu sapos ol i gat namba bilong sumatin na tisa we ol wan wan skul i pulapim long skul sensus fom. Kampani bai skelim ol samting long nem lis long sensus fonnasekap sapos sampela skul i giaman na putim nem i

go antap o givim giaman skul. Em bai givim ripot kam bek long dipatmen na dipatmen bai mekim save long ol.

Kampani bai givimautskul ol beg, pen, pensil, buk, rula, kreyon bilong elementeri pikinini, na baibel bilong olgeta sumatin.

Dokta Tapo i tok gavman nau i givim sapot long edukesen na ol papamama i nogat rait long holim bek pikinini bilong ol. Em i askim ol papamama long salim olgeta pikinini go long skul.

Dokta Tapo i tok moa olsem ol pikinini husat go skul nau long elementeri bai no nap long pinis inap oli pinisim gret 12.

"Olsem na mi askim olgeta papamama long salim olgeta pikinini go skul na bihain ol bai gat gutpela laip.

Gavman bilong yu i baim olgeta samting na yu bai wari long wanem samting na bai yu holim pikinini bek," Dokta Tapo i tok.

# DRINKERS & FEEDERS

Buy 2 x 20kg Tablebirds Stockfeed & recieve 2Ltr Drinker or 3kg Feeder  
Buy 2 x 40kg Tabebirds Stock Feed & recieve a 4Ltr Drinker or 6kg Feeder

# FREE



AVAILABLE AT PARTICIPATING DISTRIBUTORS NATIONWIDE



# CSTB i tok ol i bihanim rot long givim kontrak

**SENTRAL Saplai na Tenda Bod (CSTB) i bihanim olgeta rot bilong givim kontrak bilong tenda i go long kampani bilong dilim ol marasin i go long Helt Dipatmen na ol haus sik long kantri.**

Seketeri bilong Sentral Saplai na Tenda Bod, Babaka Naime i tokim *Wantok Niuspepa* olsem, CSTB i bihanim olgeta lo bilong givim awod bilong pablik tenda taim ol i givim awod i go long wanpela bida bilong ol marasin saplai long kantri, las yia.

"Mipela pinisim olgeta rot bilong putim aut tenda na skelim ol bida

na bihanim mipela givim dispela tenda i go long kampani i soim olsem em i gat ol pasin bilong wok i bihanim ol lo bilong tenda na mipela i givim. Mi no save bilong wanem na ol lain i wok long komplem," Mista Naime i tok.

*Wantok* i askim Mista Naime, long toktok i bin kamap long wanpela foram CCAC i bin holim las wik olsem, bilong wanem na CSTB i givim kontrak long Borneo Pasifik taim i gat narapela tupela kampani i kam wantaim mak bilong mani i liklik moa long Borneo Pasifik.

Em i tok, "Borneo Pasifik Fama-

sutikal i save mekim dispela wok insait long PNG inap long 10-pela yia na ol i gat moa ekspiens long mekim dispela wok.

Wantaim ol dispela stori bihain ol i winim ol narapela kampani long kisim dispela tenda long dilim marasin saplai insait long kantri aninit long Helt Dipatmen."

Em i tok, ol narapela tupela kampani i no gat wankain ekspiens long dispela wok insait long PNG na ol i no bikpela kampani.

Borneo Pasifik i gat bikpela opis na baktua long Gordons indastri elia long Pot Mosbi.

Insait long foram bilong CCAC long Februeri 3, Profesa Mola, Tersera bilong PNG Medikal Sosaiti i tok, dispela bikpela opis na baktua long Gordons em Praim Minista i bin opim long las yia tasol. Na insait long 10-pela yia Borneo Pasifik i bin winim moa long 60 pesen bilong ol tenda gavman i bin putim aut.

Em i tok dispela kampani i no save wokim marasin, nogat ol i save baim na dilim marasin. Ol marasin ol i save givim aut em i gat tok orait bilong Wol Helt Ogenaisesen na dispela awod i bin kisim tok orait bilong Nesenel Eksekutiv

Kaunsil (NEC) na ol Provinsal Helt Bod.

"Sentral Saplai na Tenda Bod em i ejensi i save mekim wok bilong ol tenda na mipela bihanim olgeta rot bilong tenda long givim dispela kontrak.

I gat spesel komiti aninit long Dipatmen bilong Helt i gat ol speselis dokta husat i bin lukluk long ol eplikesen bilong ol tenda, pastaim long mipela i givim awod." Mista Naime i tok.

Mista Naime i tok, ol i no kisim ol lain olsem WHO na ol Dokta Asosiesen na Medikal Sosaiti bikos ol i laikim ol i stap indipenden.

## EHP Gavana skelim K1.3m helpim mani

### Sape Metta i raitim

LONG wik i go pinis, ol skul, koreksenal sevis, PNG Pawa, ol sios grup na ol liklik ples balus long ol ruel long Isten Hailans i kisim helpim mani inap long mak bilong K1.3milien i kam long opis bilong gavana bilong provins, Julie Soso Akeke.

Bikpela hap bilong dispela mani, K500, 000 i go long PNG Pawa long kamapim projek bilong pulim pawa i go long Uggai/Bena distrik.

Ol arapela ogenaisesen olsem ADRA husat i go pas long wok bilong wara saplai projek long Korofeigu eria i kisim K200,000 na Bundaira Koreksenal sevis long Kainantu i kisim K99,000.

Kama SDA na Bena

SDA praimer skul i kisim K200,000, Henganofi sekondari skul i kisim K100,000 na Okapa haikul tu i kisim K100,000 na Okapa haikul i kisim K100,000.

Ol liklik ples balus olsem Aziana, Owena na Wonenara K60,000, Koran na Mengino namba 2 ples balus i kisim K15,000 na Guasa ples balus i kisim K10,000.

Gavana Akeke i tok, dispela ol mani i bilong helpim ol skul, projek bilong ol sios na gavman ejensi na apgredim ol liklik ples balus long provins.

Luk long dispela ol mani, i luk olsem em i namba wan taim long kain helpim na sapot i kam long dispela gavman bilong Gavana Akeke long provins.

## Ol haus sik kisim nupela masin

POT Mosbi Jeneral Haus Sik nau i gat nupela masin bilong givim win. Ol i kolim dispela masin oxylog 3000 plas.

Dispela nupela masin bilong givim win em i kos olsem K72,000 na Pricewaterhouse Coopers i bin givim long las wik. Dispela masin bai i stap long intensive kea yunit long helpim ol sik lain husat i painim taim long pulim win.

Dairekta bilong medikal sevis, Dokta David Mokela i tok tenkyu long Pricewaters Coopers long givim dispela gutpela masin long sevim laip bilong ol sik lain long imejensi wod.

Dokta Mokela i tok haus sik i gat 4-pela masin bilong kisim win na dispela nupela em i mekim 5 tasol em isi long karim i go i kam olsem na em i bringim moa hop long haus sik.

Drager, wanpela bikpela kampani long Japan I save mekim ol dispela kain masin bilong givim win.

Price waterhouse Coopers wantaim lidasip bilong Prinsipel bilong asurens na edvaisori sevis, Lynn Walsh i kamapim dispela mani long baim dispela masin.

Long wankain taim tu Modilon Jenerol Haus Sik long Madang Provins i kisim wanpela nupela orthopaedic ikwipmen.

Dispela i masin bilong stretim ol bun bruk, o bun i krungut. Ol dispela kain ikwipmen i sot tru long kantri na Modilon Haus Sik i laki long kisim wanpela wantaim mani i kam long ol SVD misineri bilong Poland.

SVD miniseri sosait long Poland i givim olsem presen bihain long askim bilong Pro-

fesa Jerzy Kuzma, dokta i go pas long Orthopaedic Yunit long Modilon Haus Sik.

Prof. Kuzma em i SVD o Divain Wod Misineri long Madang. Dispela masin em ol i mekim long Rasia na nem bilong em Ilizrov External Fixator.

Ol i bin kisim i kam long las yia long stretim han na lek bilong ol lain i gat bagarap. Em i ken stretim ol bun i no slip gut na tu em i ken mekim ol lek i sot liklik, i go longpela long mak bilong narapela.

Em i ken mekim orait ol sik lain wantaim bagarap long bun inap long 9 mun. Dispela masin i kos K50,000 na em i sevim pinis laip bilong wanpela yangpela mangi, krismas bilong em 15, bilong Angoram long Is Sepk Provins.

Rait lek bilong Haule Jigme i bin bruk na meme long taim

em i bin kapsait long wanpela kar long Epril 2012. Ol dokta i bin rausim ol bun long lek na em i no gat bun. Em i save wokabout wantaim stik. Nau Profesa Kuzma i yusim dispela laip sapot ikwipmen long rausim wanpela hap bun bilong lep lek na i putim long rait lek.

Jigme i bin lusim skul 2 yia i go pinis taim em i stap long gret 5, tasol nau em i ken gobek long skul bikos em i ken wokabout na em bai i no hatwok long holim stik.

Dispela ikwipmen, 'Ilizarov fixator' em i kisim nem bilong em long man i kamapim, em wanpela dokta bilong Rasia na em i save katim ol sik man na stretim ol.

Em i kamapim dispela masin long stretim bun bilong ol lain i gat sik long bun na i stap longwe tru long haus sik.



**Piksa na stori i kam long Eric Sinabare Gaubin Haus Sik long Karkar Ailan long Madang Provins.**

1. Ol strongpela hat wok wokmanmeri bilong Gaubin Luteran Haus Sik long Karkar Ailan, Madang Provins i sindaun long lukim ol sik lain long aut pesen eria bilong haus sik. L-R. Sista Michelle Tamen, Sielon Asar na Kailok Mamore. Em ol i save mekim wok olsem klinikal nes.

2. Wok bilong lukautim na sevim ol mama em stap long han bilong ol wokmanmeri bilong haus sik, na ino long narapela hap. Hia em Sista Ruth Mulul i skelim sikmeri Jenifa long Gaubin Luteran Haus Sik.



# The Voice Inc Yunivesiti Lidasip Program



**Yut, Meri na Famili**

**Pastor Barbara Lunge**

## Wasman i mas winim trampet bilong God nau

**YU** wanpela pikinini man bilong God, ating yu wanpela wokman o wokmeri bilong God, o ating yu stap hia long kirapim na skruim Kingdom bilong God i go?

Wasman em i man husat i save sanap na lukautim was tawa antap long banis bilong wanpela siti.

Yumi olgeta wan wan bilip man na meri i gat wok long stap olsem wasman insait long spirit sampela taim long laip bilong yumi. Yu ken stap olsem wasman i lukautim famili bilong yu, o banis bilong lukautim sios o siti, o God i ken givim wok long yu long stap wasman bilong nesen bilong yu. Sampela lain bai i gat bikpela singaut long dispela kain wok bilong prea.

Wasman insait long spirit em i gat spesel singaut long God na i givim em ol samting bilong mekim wok. Long Matyu sapta 13 God i tok, olgeta bilipman meri i gat ai bilong lukluk na ia bilong harim. Tasol wasman bilong spirit i mas gat ol samting God i givim ol samting long ol i ken lukim wanem samting ol narapela lain i no inap long lukim. Ol i ken lukim taim birua i redi long kam bagarapim ol lain.

Birua i save karamap na i kam, tasol spirit wasman em i redi tru na i save long winim trampet na toksave long famili bilong em long redi na birua i no ken bagarapim ol. Em i ken save long wanem samting bai i kamap long laip bilong sios. Wasman bai hariap tru long luksave olsem wanpela birua i kam insait taim gat bel hevi, kros na paul pasin i kamap namel long ol bilipman meri.

Long stori bilong tumbuna i kam, i soim ol wasman i save karim banis bilong olgeta lain long siti wantaim em. Ol lain long siti bai inap long slip gut bikos ol i save wasman i stap. Wasman Isikel. Long buk bilong Isikel, sapta 33 i gat wanpela hap toktok bilong God i save putim wasman na wanem samting em i mas mekim. God i tok long Isikiel olsem, "Yu pikinini biong man, mi mekim yu kamap wasman bilong haus bilong Israel" (v7). Tasol God i tok narapela samting pastaim long dispela tok. Em i tok, "Tok bilong God i kam gen, na i tok, Pikinini bilong man, toktok long ol pikinini bilong ol pipel bilong yu na tokim ol. 'Taim mi, God i bringim bainat antap long graun na ol pipel, kisim wanpela man long hap bilong ol na putim em olsem wasman, taim em i lukim bainat i laik kam antap long graun bilong ol, em i mas winim trampet na toksave long ol pipel, na husat i harim krai bilong trampet na i no bihainim tok save, na sapos bainat i kam na rausim em, blut bilong em bai i stap long het bilong em yet. Tasol husat i harim na bihainim tok, em bai stap gut. Tasol sapos wasman i lukim birua na i no winim trampet, na ol pipel i no save, na bainat i kam na rausim sampela lain namel long ol, bai dai wantaim sin bilong ol, tasol blut bilong em bai i stap long han bilong wasman. Olsem na yu pikinini bilong man: Mi mekim yu kamap wasman bilong haus bilong Israel; olsem na yu harim wanem samting long maus bilong mi na givim tok lukaut long ol," (Isikel 33: 1-7)

**Sapos yu laik toktok moa o yu nidim prea, yu ken rait long: Evangelis Barbara Lunge, ROGIM, P.O. Box 3063. Boroko. NCD. PNG, o ring long bm 67331426 OR 71075829 dg**

EPLIKESAN bilong Lidasip Developmen Program (LDP) i redi nau long ol yangpela man na meri i ken aplai long go long skul.

Long taim bilong statim skul program las wik long Yunivesiti bilong Papua Niugini, The Voice Inc, i toktok long lidasip developmen program bilong ol.

The Voice Inc em i wanpela yut developmen ogenaisesen long PNG na em i save ranim ol lidasip program wantaim ol sumatain bilong ol yunivesiti. Dispela program i gat as tingting long helpim ol sumatin i mas gat bikpela tingting long laip bilong ol long bihain, na tu strongim tingting bilong ol na kamapim sampela rot long ol i ken givim bek sampela gutpela samting long komyuniti bilong ol.

Insait long wanpela sesen bilong ol namba wan yia sumatain husat i bin wok long kisim orientesen long las wik, The Voice Inc i toktok long ol program bilong ol na ol lain i bin kisim pinis dispela kos, Lidasip Developmen Program (LDP) long dispela taim bilong toktok.

Toktok i bin kam long ol 4-pela lain sumatin husat i bin kisim dispela trening pinis. Brian Sasingian, Jerome Sesga,



**Ol lain i go pas long toktok bilong Lidasip Developmen Program bilong The Voice Inc, long Yunivesiti bilong PNG. Long lephan i go long rait han: Jerome Sesga, Sebangaz Siming, Brian Sasingian and Stephannie Kirriwom.**

Stephannie Kirriwom and Sebangaz Siming i bin autim wanem samting ol i lainim. Ol i strongim ol narapela nupela sumatin long ol i ken joinim dispela program tu. Ol i tok save long wanem kain rot ol nupela sumatin i ken go insait long dispela program.

"The Voice i gat bilip long yu,

long helpim yu long yu bai gat bilip long yu yet." Stephannie Kirriwom i tok.

The Voice Inc i wok long kisim nau nupela eplikesen bilong 2014 Lidasip Developmen Program. Wantaim visen bilong em long kirapim ol yangpela long wok bilong lida, em i tingting bilong The Voice Inc long

strongim ol yangpela lida long ol i mas gat plen long laip na inap long helpim komyuniti na nesen na wol.

LDP i save ran long Senta bilong Lidasip long Yunivesiti bilong Papua Niugini ((UPNG) na ol narapela bai klostu i op long PNG Yunivesiti bilong Teknoloji (UNITEC) long Lae.

## PRAIM MINISTA BILONG OL MERI PNG:



Ol meri long PNG i stap wantaim bikpela bel sori bihain long dai bilong biknem meri lida, Scholar Warai Kakas long las wik. Mis Kakas i Presiden bilong Nesenel Kaunsel ov Wimen (NCW), em i makim maus bilong olgeta meri long kantri, i bin dai bihain long em i sik. Funerel sevis long selebretim laip na wok bilong Mis Kakas i bin kamap long Sen Joseph's Katolik Sios, Mosbi long dispela wik Tunde. Planti meri, ol meri lida na ol palamen na nesenel lida i bin kamap long sios sevis long tok gutbai long meri ol i kolim long "praim minsta" bilong ol meri. Ol meri i bin soim sori bilong ol long gutpela na strongpela lida husat i save toktok strong long rait, gutpela sindaun na wankain luksave long ol meri. Hia ol meri i sori, krai na wokabout wantaim kofin bilong Mis Kakas i go insait long haus lotu. Stori i stap long Pes 4

**Poto: Nicky Bernard**

## Siti Misin Fam kisim nupela masin

**Frieda Kana i raitim**

SITI Misin Fam long Mirigeda i kisim wanpela nupela masin bilong poto kopi na print i kam long Fuji Xerox Bisnis Senta long Waigani long dispela wik.

Dispela masin i kos K30,000 na Grup Sif Eksekutiv Opisa bilong Fuji Xerox, Cameron Mackellar i tok ol i amamas long helpim kain ol ogenaisesen olsem husat i save mekim gutpela wok long komyuniti.

"Mi amamas long mipela i ken helpim yupela long liklik samting olsem," Mista Mackellar i tok.

Pasto Kirt Triche i tok dispela em i bikpela samting tru long laip bilong fam long helpim ol tarangu yut husat i wok long stap long fam na kisim kain kain trening bilong helpim ol long painim gutpela laip long bihain taim.

Nau i gat samting olsem 200 o moa yut i stap long senta long Mirigeda fam na ol i save lainim

kain kain laip skil olsem; wok kapenta, mekenik, penta, welda, sekyuriti na long wok bilong fama. Dispela Xerox masin bai helpim senta long mekim wok bilong ol.

Siti Misin i save kisim ol yut long strit husat i no gat skul na wok na tu sampela i no gat papa na mama, na ol i save givim trening long ol wantaim gutpela laip skil olsem bai ol i ken painim wok na gutpela sindaun long bihain taim. Tenpela yut mangi nau i stap redi long

wok wantaim Swan intenesenel olsem sekyuriti.

Siti Misin i save kisim ol mangi, krismas bilong ol i mas 16 na i go long 24. Ol i save stap 16 months long dispela trening na bihain go aut long painim wok.

Menesa bilong Vokesenel Trening, Pasto Kirt Triche i tok dispela masin bai i stap insait long nupela opis haus ol i wokim pinis na bai ol i blesim long tupela wik bihain long 25 Februeri.

# Mama Beate Troeger i dai pinis

Paulus Tali i raitim



**MAMA BILONG OL LUTERAN YUT:** Nau i dai Beate Troeger long Lutheran Sios sinod i bin kamap las mun long Karkar Ailan.

Mathias Troeger i save mekim wok bilong ol yangpela insait long 17 distrik bilong Lutheran Sios.

Tupela marit i save holim han wantaim na karim wok yut i go inap long taim em i dai.

Mathias Troeger na mama

Beate i kam long Saxsony insait long Laipzig Lutheran Sios. Mis- sion OneWorld long Bavaria long Jemani i bin salim tupela i kam long wok misin bilong Lutheran Sios long Papua Niug- ini.

Lukluk long wok bilong mama Beate, ripot i tok, em i wanpela dentis tasol em i bihainim man i kam na mekim wok yut inap long dispela birua i bungim em. Diken Mathias Troeger wantaim BeateTroeger i gat wanpela pikinini nem bilong em Tobias, husat i stap yet long asples Je- mani.

Tupela marit i bin kam long Papua Niugini long yia 2010 bi- hainim singaut bilong God long mekim wok bilong sios insait long yut opis bilong ELCPNG inap long foapela yia olgeta.

Evanjikal Lutheran Sios het opis long Ampo na kantri i kirap nogut long harim dispela nius long dai bilong mama Beate. Spesel lotu i kamap long St. Pauls Lutheran Sios long Goroka

taun long Trinde 29 Januari, we Evanjelikal Lutheran Sios bilong Papua Niugini bai givim bodi (hand over) bilong mama Beate i go long Evanjelikal Lutheran Sios bilong Bavaria.

Olgeta Lutheran yut insait long Papua Niugini i save gut long mama Beate wantaim Diken Mathias Troeger na indai bilong em i kamapim bikpela sori insait long yut wok bilong ELCPNG olgeta. Long wanem, maski wanem kain hap bilong kantri - tupela marit i save givim taim bi- long tupela long mekim olgeta yut wok long inapim ministri bi- long sios tupela i kam long mekim.

Evanjelisim Dipatmen seke- teri Rev. Binora Yunare, Yut Dairekta, Faen Mileng, meri go pas long opis bilong ol meri, Cathy Mui wantaim ol mama in- sinit long 17 distrik bilong sios i sori long lumis gutpela meri bi- long wok na ol i salim tok sori i go long wokman Diken Mathias Troeger.



## Sol na lait

**P**LANTI manmeri bilong PNG i laikim sol tumas. Sapos kaikai i nogat sol, teis bilong em i no kamap naispela. Mi save lukim planti manmeri bilong PNG, maski kaikai gat planti sol pinis, ol i bai putim moa sol antap long en.

Long Sande 9 Februari 2014, long lotu kalenda bilong lotu Katolik, yumi ridim Gutnius bilong Jisas, liklik hap bilong skul antap long maunten Matiu 5:13-16 ).

Em i gat naispela skul bilong salensim olgeta Kristen manmeri long kamap SOL na LAIT long olgeta de long laip bilong yumi.

Taim mi givim tokskul long Hanuabada, Baruni na Bogi, mi bin stori long wanpela ek- spiriens long laip bilong mi long yia 1989.

Bipo mi kisim odinesen long kamap pater, mi bin go long Surabaya, long Java Ailan. Mi gat sik long nus ol i kolim sinusitis. Taim speselis dokta bilong nus, yau na nek i bin sekim, em i tokim mi olsem mi mas wokim operesen long si- nusitis.

Taim mi wetim, wanpela grup bilong yunivesiti studen i askim mi long givim skul long rikolek- sen bilong ol. Ol i bin makim dispela hap gut- nius bilong Matiu 5:13-16 - SOL NA LAIT olsem het tok long rikoleksen bilong ol.

Planti i bin kamap long dispela rikoleksen. Ol i skul long kain kain yunivesiti i stap long Surabaya. Sampela i skul long Stet yunivesiti, sampela long praivet yunivesiti na sampela bi- long Kristen yunivesiti na Katolik yunivesiti.

Bihain long givim skul long ol, mi bin putim ol long tripela grup bai ol i serim o skruim moa long dispela skul bilong Gutnius. Bihain long grup sering, ol i kam bek long plenum na serim gen wanem samting grup bilong ol i bin serim. Wan- pela askim bilong stiaim ol long sering bilong ol; "Olsem wanem yumi kamap SOL na LAIT long narapela manmeri?"

Taim long serim bilong bikpela grup, wanpela grup i autim olsem; "SOL em i save mekim kaikai i kamap swit na mekim yumi kaikai planti na stap klostu long kaikai olgeta taim. Olsem SOL, yumi mas kamap naispela olgeta taim bai planti manmeri i amamas stap wantaim yumi.....".

Narapela grup i autim....."Sol i save mekim kaikai o abus i stap fres olgeta taim. Katolik manmeri i mas wokim gutpela samting bai bilip bilong yumi i mas stap fres olgeta taim wantaim God".

Taim grup namba tri i givim ripot, wanpela yangpela Saina meri i tok: " Sol i save mekim manmeri i hangre long wara olgeta taim.....". Taim em i autim olsem, planti manmeri i mekim hhhuuuuuuusssss.....nois...i luk olsem sampela i no amamas long wanem samting em i autim.

Mi tokim ol long no ken wokim nois na larim Saina meri i pinisim ripot bilong em.

Na em tok: "Yupela i no bilip olsem SOL i save mekim yumi hangre long wara olgeta taim? Yu dringim wara i pulap long sol.....yu bai painim kol wara olgeta taim bikos SOL i mekim yu drai long wara. Yupela tingim em i samting pani na nogut ah? Nau mi salensim yupela olgeta; Olsem Katolik yunivesiti studen, yu save mekim manmeri i hangre long Jisas Krais olgeta taim o nogat?"

Long wankain salens Saina meri i givim long ol pren bilong em, mi tu i bin yusim wankain tok long salensim olgeta manmeri i harim skul bi- long mi long Hanuabada, Baruni na Bogi.

Long Pasin Katolik bilong yumi, yumi save kamap SOL bilong mekim narapela manmeri i hangre long Jisas Krais olgeta taim o nogat?"

## Tingim pestode bilong Santu Francis de Sales

OLGETA yia long Januari 24, Katolik sios i save tingim Santu Francis de Sales, was santu bilong ol lain i save raitim stori na ol nius ripota.

I bin gat wanpela liklik bung bilong ol Katolik nius ripota i kamap long Mosbi long tingim dispela de.

Long namba wan taim tru, Komisyon on Sosel Komyunike- sen bilong Katolik Bisop Kon- prens bilong Papua Niugini na Solomon Ailan i bin stretim program bilong dispela bung long Emmaus Konprens Senta long Don Bosco Institut long Boroko.

I bin gat liklik grup bilong ol nius ripota, ol woklain bilong redio na ol arapla wokmani bi- long sios i kamap long dispela bung.

Mama i bin karim Francis de Sales long 21 Ogas 1657 long kantri Frans. Papa na mama bilong em i gat biknem long dispela hap.

Papa bilong em Francois de

Sales na mama bilong em Francoise de Sionnaz. Ol tu- pela i gat sikispela pikinini man na Francis i namba wan pikinini bilong ol.

Papa i laik bai Francis i mas go long bikpela skul na kamap mejistret. Tasol Francis yet i no laik bihainim laik bilong papa bilong em.

Long 1583, em i go long skul bilong ol Jesuit long Col- lege de Clermont long Paris.

Long 1584 em i bin stap long wanpela bung we ol i tok- tok long wanem samting bai kamap long laip bihain long man i dai.

Francis i bilip olsem em bai go long hel na em i bin wari.

Wari klostu i kilim em na em i sik i stap na i no inap wok- about inap Desemba 1586.

Long Januari 1587, em i go long pre long Our Lady of Good Deliverance, wanpela blek madona, na em i givim em yet i go long mama Maria Virgo Kwin na promis long



WAS SANTU BILONG OL NIUSLAIN: Santu Francis de Sales

givim laip bilong em i go long God na bai em i no inap long marit.

Francis de Sales i kamap pris long 1593.

Em i kamap bisop bilong Jeneva long 1602 tasol em i stap long hap bilong kantri

Frans bikos ol lain Kalvanis i bin bosim Jeneva, biktaun bi- long Swiselan.

Em i dai long 1623. Long 1923, Pop Pius 11 i bin tokaut olsem Sen Francis de Sales i was santu bilong ol lain i save raitim ol stori na ol ripota.

## Sios grup mekim fri wok long Goroka taun

Sape Metta i raitim

**TAIM** wanpela grup i karim bus- naip, savol na ol arapela tul i go raun long ol banis long Goroka taun, no ken ting olsem grup ya i laik bringim trabel, na bagarap i go long ol manmeri, nogat! Ol i go wantaim dispela ol tul long mekim fri volantia wok insait na autsait long ol banis long taun.

Yut lida na mausman Ryan Ale- wong i tok, ol manmeri na yut husat i kamapim dispela grup i amamas long mekim fri volantia wok long wanem, ol i laik lukim taun i mas stap klin na soim gutpela piksa i go long nesene, provinsal, lokal lida na ol manmeri long provins.

Em i tok, grup i gat ol yanpela man na meri husat i drop aut long skul na ol arapela yut husat i save kisim smok nogut mariwana na wokim ol kain kain bikhet na trabel pasin. Em i tok ol i amamas long joinim grup long mekim volantia wok long wanem ol i lukim olsem sapos ol i sindaun na stap nating,

ol i ken kisim planti tingting nogut long kamapim ol bikhet na trabel pasin.

Alewong i tok, grup i gat moa long wan handet memba na ol i bin wok long klinim ol eria long bikpela maket na ol arapela eria long taun stat long las wik. Em i tok ol bai go het yet long klinim ol eria insait long ol bikpela institusen olsem NBC redio stesin, polis stesin, kot haus, provinsal gavman eria na ol arapela pablik na praivet eria long taun.

Em i tok, "Mipela mekim dispela wok fri, tasol mipela bai luksave na mekim dispela ol wok, maski sapos mipela i no kisim pe. Tasol sapos ol lain i tingting long helpim na wokim liklik donesen, ol i ken mekim long wanem dispela bai helpim long baim kol wara na sop long waswas na wasim han."

Piswara Lutheran Yut Asosiesen long Goroka i go pas we em i lidim tu ol arapela yut na memba bilong ol arapela sios ogenesesen long mekim dispela ol fri volantia wok.

## De Boismenu Kolis i kisim K150,000 helpim

DE Boismenu Kolis long Bomana Katolik Tiolojikel Institut ausait long Mosbi i ken pinisim ol sampela wok projek bilong em na tok tenkyu i go long Deputi Praim Minista, Leo Dion, long givim K150,000 I go long en.

Long las mun, Fes Seke- teri bilong deputi praim min- ista, Bernard Lukara, i bin givim K150,000 I go long Rekta long kolis, Pater Gerard Savian MSC long mekim ol wok infrastraksa mentenens na stretim ol bilding projek long De Bois- menu Kolis.

Ol yangpela man PNG na Pasifik i save skul long dis- pela kolis long kamap pater.

Long golden jubili sele- bresen i bin kamap long Ok- toba 2012, Mista Dion i bin promis long givim dispela manimak bilong pinisim ol infrastaksa mentenens pro- jek long kolis.

Siaman bilong Jubili Sele- bresen Ogenaising Komiti, Dominic ToMar, taim em i kisim sekmani long makim kolis i bin autim tok ama- mas long Mista Dion long sapotim projek we ol i bin stopim bikos mani i sot.

Taim Rekta Pater Gerard i tok tenkyu long Mista Dion na gavman long sapot bi- long ol, em i bin tok kolis bai yusim gut dispela mani long pinisim ol wok projek bilong ol.



Pop Francis bai go long Sri Lanka..

### Schappelle Corby i lusim haus kalabus

Gavman bilong Indonesia i larim Schappelle Corby, wanpela meri Australia i go fri long dispela wik Fraide bihain long em i kalabus inap nainpela yia olgeta long Bali. Em i lusim Kerobokan haus kalabus tasol bai em i stap long parol inap tripela yia olsem na bai em i mas stap long Indonesia inap taim bilong parol i pinis.

Planti pipel na ol nius lain i bin bung utsait long haus kalabus long lukim em tasol em i karamapim het na haitim pes bilong em. Ol polis i kisim em long ka i go long opis bilong prosekyuta long Bali we em i bin sainim sampela fom na bihain ol i kisim em i go long parol opis we ol i kisim mak bilong pinga bilong em na givim tok save tok save long wanem ol samting em i ken mekim long taim em i stap long parol.

Jastis Minista bilong Indonesia i bin tok orait long parole eplikesen bilong Corby long Fraide tasol ol i no bin kisim ol las pepa i go long haus kalabus inap Mande moning.

Bikpela tingting nau em dispela meri Australia bai i mas stap long Bai ailan aninit long ol strongpela rul blong parol inap long yia 2017.

Ol i ting em bai stap wantaim susa bilong em Mercedes long Kuta long Saut hap bilong Bali.

Schappelle Corby i bin gat 27 krismas long taim ol polis bilong Indonesia i bin arestim em long Denpasar ples balus long Bali long 2004 bihain long ol i painim 4.1 kilogram mariwana insait long bodi bod beg bilong em.

### Pope Francis wanbel long go long Sri Lanka

Pope Francis i tokim ol pipel bilong Sri Lanka long Itali olsem em i wanbel long askim bilong ol long em i go lukluk long kantri bilong ol.

Pope Francis i toktok long nid long belisi long Sri Lanka bihain long woa i kamap namel long ol Tamil Tiger na gavman bilong kantri.

Long Sarere, Pope i bin bungim sampela lain bilong Sri Lanka em Kardinal Malcolm Ranjith, Asbisop bilong Kolombo i go pas long ol, na ol i bin askim Pop Francis i long go lukim kantri bilong ol.

Em i bekim tok olsem em i tok tenkyu long Kardinal Ranjith long askim em long go lukim Sri Lanka. Em i tok em i laik long go lukim Sri Lanka.

Pope Francis i toktok tulong pinisim bel kros bihain long 26 yia woa long Sri Lanka i bin pinis long 2009.

Em i tokim ol olsem kantry bilong o i kolim "Pearl of the Indian Ocean" long wanem em i luk gutpela tumas - na em i sori long lukim hevi i bin kamap long kantri.

Em i laik long lukim ol pipel bilong Sri Lanka i wokbung long kamapim gutpela kantri bilong ol.

Samting 6 pesen bilong ol pipel bilong Sri Lanka nau em ol Katolik.

Luksave long ol martir blong Korea

Vatican i lukim Esia olsem wanpela hap we lotu Katolik i wok long kamap gutpela.

Tingting long raun i go long Esia i kamap bikpela long Sarere taim Vatican i tokaut olsem Pope i givim tokorait long sios i luksave long 124 pipel blong Korea ol i bin kilim dai insait long 100 yia long bilip bilong ol na Sios i luksave long ol olsem ol martir. Dispela i wanpela step long mekim ol i kamap olsem santu.

Vatican i tok Seremoni bilong Paul Yun Ji-chung na ol arapela 123 martir - ol i bin kilim dai long bilip bilong ol long lotu Katolik namel long 1791 na 1888 - bai ol i wokim long Saut Korea long August 15. I no klia yet sapos Pope Francis bai raun i go long Saut Korea na Sri Lanka long dispela taim.

### Bus paia i bagarapim Viktoria na Saut Australia

Samting olsem tupela haus i paia na planti arapela samting moa i bagarap long Viktoria taim bus paia i wok long lait i go long planti hap tru. Ol i tok Viktoria i bungim bikpela hevi stret long paia stat long "Black Saturday" long 2009.

Ol gavman opisa i tok ol i wari long sampela hap klostu long Melbon siti olsem Craigieburn na Gisborne we i win i karim paia i go hariap long ol ples we pipel i stap long en.

Strongpela tok lukaut i stap nau long ol eria olsem East Gippsland na La Trobe Valley.

Hat bilong san i go antap long 40 digri Selsius long sampela hap long rijon, tasol strongpela win i gohet taim kol i kam long sampela hap.

Long Saut Australia, wanpela bikpela paia i bin kukim hap long Bangor long Sauten Flinders Ranges.

### PNG kastom i stopim lo long kalabusim ol pipel i kilim meri

Amnesti Intenesenel i autim bikpela kros i go long Papua Niugini i isi tumas long bringim ol pipel i kilim nating wanepla meri, ol i ting i bin mekim posin na kilim narapela man long las yia.

February 6 i makim wanpela bihain long indai bilong Kepari Leniata, meri ol i bin kukim long Mt Hagen bihain long ol i bin sutim tok long em i wokim posin.

Nius bilong indai bilong em i bin raun long PNG na long wol tu, na ol i soim ol poto bilong em long dispela taim.

## Poto nius - poto nius



**OL YANGPELA BILONG BUIN:** Ol dispela yangpela man bilong Buin, Saut Bogenvil i no isi long winim kaur long tok welkam na soim amamas long Praim Minista, Peter O'Neill na deligesen bilong em i raun i go long hap.

*Poto: Veronica Hatutasi*



**OL MAKET MAMA:** Ol mama grup bilong Gordons long Nesenel Kapitel Distrik i sanap wantaim tupela boslain bilong Australia Federel Polis na bikmeri polis sajen i lukautim sait bilong Vailens Agensim ol Meri long ol komyuniti insait long Mosbi siti na ol setelmen. *Poto: Nicky Bernard*



**OL MERI TU IKAMAP:** Ino ol man tasol ol meri tu i no bin isi long kamap long ol bung bilong bungim Praim Minista, Peter O'Neill long olgeta hap bilong Bogenvil. Poto ya i soim ol meri i bin stap long welkamim Mista O'Neill na deligesen we ol program i bin kamap long Bel Isi Pak long Buka Taun. *Poto: Veronica Hatutasi*

# Impek projek i mas karamapim ol pikinini bilong yumi tu



I no gat inap tisa tu na ol material ol i mas yusim long skulim ol pikinini. Populesen bilong Papua Niugini i winim mak bilong 7milien pinis. Las mun gavman i tokaut olsem 2011 Nesenel Populesen na Hausing Sensus i winim mak bilong 7,275,324 manmeri na pikinini.

Dispela namba i soim olsem mak bilong pipel i wok long gro hariap na gavman i no gat polisi bilong kontrolim populesen.

Long baset bilong 2014, gavman i makim K700 milien i go long 7-pela yunivesiti long kantri long stretim ol samting i bagarap na skruim wok bilong kamapim spes bilong kisim moa studen.

Na Opis bilong Haia Edukesen husat i save kisim K40milien bipo long baset i bin kisim K260milien long 2014 baset. Em i bikpela hap mani tru gavman i givim i go long mekim wok bilong edukesen long ol bikpela skul insait long kantri.

Tasol yumi no save sapos ol bai kisim wankain bikpela mani olsem neks yia na long ol yia bihain o bai gavman i skelim gen K40milien i go long ol.

Mak bilong mani yumi lukim gavman i skelim i go long edukesen em i bikpela tru. Kantri i no bin lukim kain mani olsem i go long edukesen inap nau. Dispela em i bikpela invesmen gavman i putim long ol pikinini bilong yumi. Mobeta ol lain husat i go pas long lukautim mani i skelim stret i go long kamapim wok. Na ol lain husat i mas kamapim wok i no ken paulim mani o mekim ol giaman toktok na bagarapim wok. Wanpela gutpela eksampel ol lain bilong Mosbi i lukim nau em ol nu-

pela klasrum sampela kontrakta i bin statim wok long en las yia. Minista bilong Fainens i tok gavman i no inap baim ol bikos edukesen dipatmen i no givim tok orait long kontrakta i sanapim ol dispela klasrum. Klasrum i no pinis na ol pikinini i no gat spes long skul gut.

Wanem samting i kamap long eria bilong edukesen i mas kamap long helpim save bilong ol pikinini bilong yumi long bihain taim. I gat planti rot bilong wokmani i stap long kantri bilong yumi.

Wok egrikalsa em i no inap long pinis long taim ol gol na kopa na oil na ges i pinis. Graun bilong yumi bai i stap yet olsem na long taim ol provins na distrik i mekim ten yia o faiv yia plen, mobeta ol i putim egrikalsa skul o teknikel skul olsem bikpela wok i mas kamap long provins. Ol pikinini i ken go long ol dispela skul na kamap wok tru bilong helpim sindaun bilong ol.

Tude yumi wok long harim dispela hap tok 'impek projek' i kam long maus bilong ol politisen.

Tasol long taim ol lida i toktok long impek projek ating ol i save tingting tasol long kirapim ol bikpela bisnis we i kostim planti milien Kina long ilektoret bilong ol.

Ol i lusim tingting olsem 'impek projek' i karamapim tu bikpela plen bilong divelopim save bilong ol pipel long kantri.

Ol memba na provinsal gavana i mas wok strong long kamapim dispela ol projek bilong helpim ol pikinini insait long provins na ol distrik. Dispela save ol i kisim bai i gat bikpela impek long distrik na provins long bihain taim.

Dispela wik na las wik tu yumi lukim ol bikpela miting tru i bin kamap namel long gavman na ol hetman na meri bilong ol gavman dipatmen na ol ovasis opis bilong PNG tu.

Praim Minista i singautim ol i kam bung long Mosbi long toktok long bikpela wok ol i mas mekim long kamapim tru ol wok aninit long baset bilong 2014 na ol arapela bikpela wok long ol yia i kam bihain. Ating dispela i namba wan taim tru long gavman i kamapim kain bikpela bung olsem wantaim ol long begin bilong yia na tok save long ol i mas kirapim tru wok. Yumi amamas long Sif Seketeri husat i go pas long stretim ol program na wok redi bilong dispela bikpela bung. Na yumi luksave long Praim Minista husat i lida bilong gavman na kantri. Em i laik lukim kaikai i mas kamap nau olsem bai ol manmeri na pikinini bilong kantri i ken lukim na pilim tru ol gutpela senis gavman bilong em i kamapim.

Wok bilong skelim mani bilong baset i go stret long wok gavman i makim long en em i no isi wok. I gat planti salens bai kamap long putim mani i go long ol wok i no stap insait long baset. Ol pablik sevan i save kisim bikpela presa i kam long ol politisen, tasol ol i mas sanap strong na tok klia olsem i no gat mani long mekim ol wok outsait long baset.

Long dispela wik tu, ol memba bilong yumi i bung gen long namba wan kibung bilong ol long Palamen long dispela yia. I gat planti wari na



hevi bilong ol ilektoret i stap em ol bai autim long dispela kibung. Na ol minista bilong gavman tu i gat sampela bikpela askim na toktok ol bai mekim long dispela bung. Long namba wan de yumi harim pinis ol toktok bilong edukesen na wanem samting bai kamap nau long ol pikinini bilong yumi.

Minista bilong Haia Edukesen i tok save olsem long pinis bilong dispela yia 2014, bai i gat samting olsem

32,000 gret 12 sumatin i pinisim skul. Liklik namba bilong ol tasol bai inap long go long ol 7-pela yunivesiti na ol arapela bikpela skul. Watpo na dispela hevi i kamap? I gat wanpela bekim tasol.

As bilong dispela hevi em bikos kantri i no gat inap yunivesiti na ol arapela bikpela skul bilong givim save long ol pikinini bilong yumi. Minista tu i mekim dispela hap tok. Na em i singaut i go long ol provinsal gavana na ol

memba bilong palamen long kamapim plen bilong sanapim ol bikpela skul long provins na distrik long helpim ol pikinini.

Gavana bilong Nu Allan tu, i tokim palamen olsem em i no sapotim polisi bilong gavman long kamapim kompalsri edukesen, o kamapim lo we olgeta pikinini i mas go long skul.

Em i tok dispela plen bai i no inap karim kaikai bikos i no gat inap spes bilong ol pikinini long ol skul insait long kantri.

## Ol Gubil pipel amamas long kisim sevis

Michael Duncalfe i raitim

LONG las mun wanpela liklik balus i bin lusim Vanimo na i go pundaun long liklik komyuniti bilong Gubil long Telefomin. Ol paip, simen, plaiwut, na ol arapela gutpela samting bilong komyuniti divelopmen i bin stap insait long dispela liklik balus.

Taim em i pundaun long liklik ples balus long Gubil, wanpela singsing grup bilong ol manmeri i bin welkamim wantaim ol naispela singsing tumbuna. Ol meri i bin kalap kalap na singsing, na ol man i holim bunara na singaut na raunim balus.

Dispela em pasin tenk yu bilong ol pipel bilong Gubil. Ol dispela lain i save mekim olsem taim wanpela man, meri o kampani i bringim gutpela samting i kam long ol.

Taim ol manmeri bilong Gubil i lukim ol paip, ol i amamas tru, long wanem, ol i save olsem ol dispela paip bai



Singsing grup bilong Gubil i welkamim balus bilong MAF.

bringim wara i kam klostu long ol, na bai ol i no inap kisim taim gen. Planti manmeri bilong Gubil i save wokabout longpela rot long kisim wara,

na nau taim ol paip i kamap, ol i save olsem bai ol i no inap wokabout longpela rot gen long go kisim wara.

Eria we ples Gubil i stap

long en i save kisim 3.5 mita ren wara long wanpela yia, tasol ol pipel long hap i no gat gutpela samting olsem tenk long putim wara.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Wol nius foto



Australian snoboda Alex "Chumpy" Pullin i go pas wantaim Australia tim long bikpela opening long Sochi 2014 Seremoni.



*Olgeta poto i kam long ABC netwok*

Oi i painim bodi bilong wanpela British klaima Jonathan Conville antap long Swiss Alps bihain long e mi lus long 3-pela 10 yia i go pinis. Man ya i lus long yia 1979 long ais mauten long Matterton long Swiss Alp bihain long ais i wok long melt i kamdaun. Oi DNA i soim olsem em Jonatha na ol i singautim famili bilong em long karim ol bun bilong em i go bek long ples na planim.



Polis i no save olsem mama i laik karim na papa i spit long kar long go long haus sik, na ol i ronim tasol ol i kirap nogut long painim aut olsem mama i karim bebi gel long baksait bilong kar pinis. Poto i soim Metaouk Ing na man bilong em Seyha Ing i sindaun arere long helti bebi gel bilong ol long haus sik.



Meryl Davis na Charlie White bilong Yunaited Stet danis na sket wantaim long Sochi 2014 Ais olimpik.



Pasin bilong spit tumas kilim dai wanpela liklik boi husat i gat 6-pela krismas na bagarapim mama na tupela kasen bilong em husat i stap nau long haus sik. Polis i sasim wanpela mama long dai bilong dispela liklik boi long Sydney childcare senta. Dispela famili i wokabaut arere long rot klostu long childcare senta taim kar i spit i kam na bamim ol.

# Naispela Sohana Ailan

**Veronica Hatutasi i raitim**

## **S**OHANO Ailan long Buka Basis, Atonomas Rijon bilong Bogenvil (AROB) i wanpela naispela ples.

Em i wanpela ples tu we ol famili, poroman, ol visita na husat moa lain i painim hap bilong rileks o malolo gut, waswas na swim long solwara i save go long en.

Long ol wiken olsem long Sarere na Sande, bai yu lukim ol yangpela meri, ol yangpela mama na ol pikinini i redim ol lans kaikai na ol wara samting, kalap long motobot na ran antap long blupela solwara bilong Buka Basis na katim i go long hapsait bilong Sohana Ailan.

Sohano Ailan i bin hetkota bilong Bogenvil long ol yia i stat long 1950's, 1960's na 1970's inap ol i bin statim Panguna Main. Na ol i kamapim Arawa Taun na surukim hetkota long Sohana i go long Arawa.

Tasol taim Sohana i hetkota, bikpela haus sik bilong Bogenvil i bin stap long wanpela hap bilong Sohana Ailan wantaim haus bilong ol dokta, ol nes na ol narapela haus sik woklain na ol helt woka.

Maski senis long edministresen i kamap, Sohana Ailan i no lusim naispela lukluk bilong em na em i stap naispela yet.

Sohano Ailan i no stretpela graun tasol, nogat.

Stretpela hap graun i bin gat haus sik na ol haus bilong ol woklain na skul tu.

Em i gat hap maunten i stat long nambis yet na i go antap. Dispela hap em i naispela stret. Ol kokonas diwai i sanap, ol naispela flawa na ol sampela samting we ol soldia bilong Japan i bin lusim taim namba tu bikpela pait, o Wol Woa 2 i pinis. Ol edministretiv opis i bin stap long en wantaim ol haus bilong ol pablik sevan.

Piksa long dispela hap i naispela tru taim yu stap long haus antap long maunten na yu lukim ol lip bilong kokonas diwai i danis long win, na taim yu lukluk i go daun, yu lukim klia, blupela na naispela solwara.

Tasol taim pait long Bogenvil i kamap na pipel i ranawe lusim Arawa, na ol i surukim hetkota bilong Bogenvil i go bek long Buka, Sohana Ailan i kam gut gen.

Ol wok manmeri bilong Buka Haus sik i go bek stap long Sohana na wankain tu long ol pablik sevan. Long 2009, ol i wokim tu ol naispela haus bilong ol pablik sevan antap long maunten hapsait.

Sampela ol nupela bilding i kamap long Sohana em ol dispela.

Wanpela ges haus ol i kolim Buka Luman antap stret long maunten top. Taim ol i no bildim ol ges haus long Buka Taun, dispela ges haus tasol em ol pablik sevan na ol visita long PNG na ovasis i save slip long en.

Long 2009 na 2010, ol i sanapim wanpela risot we ol visita na turis i ken go stap long en. Ol i wokim ol step long nambis yet i go antap long risot ples. Naispela tru.

Long hap bilong ailan san i go daun sait, wanpela transit haus bilong ol Tasman Ailan Atols i stap nau.

Memba bilong Not Bogenvil, Louta Atoi, i bin givim mani long bildim dispela transit haus i gat 8-pela rum we 8-pela famili i ken stap long em taim ol i pinis

long haus sik o ol kain samting olsem, na wetim sip bilong go long ples. Planti taim, em i save kisim namel long 6 na 12-pela mun long wetim sip long go long ol Atols.

Sohano Ailan i gat wanpela maket we i save op long 7-pela de. Maket i save salim ol kaikai, buai na pis samting. Taim maket long Buka Taun i pas, ol pipel i save kalap long motobot i go long Sohana maket.

Isi isi, naispela Sohana Ailan i wok long bungim hevi bilong "global warming" na solwara i kam antap na karim graun na ples, olsem poto dispela ripota i kisim long las mun i soim.

Tasol maski ol nupela senis i kamap, na tu, solwara i wok long go insait na karim graun na ples, Sohana Ailan i stap naispela yet. Na sapos yu laik limlimbur i go long AROB, tingim naispela Sohana na gutpela malolo yu ken kisim long hap.



1



2



3



4



5



6

**1: NAISPELA PIKSA:** Sanap long sait bilong diwai lukluk long naispela nambis bilong Kokopau i go hapsait long Sohana Ailan.

**2. AMAMAS LONG SOHANO NAMBIS:** Rose, Carol, Kristy na Vero em ol dispela yangpela meri Siwai i save stap long Kokopau i amamas long kisim gutpela malolo na waswas long nambis bilong Sohana Ailan.

**3: FAMILI:** Sohana Ailan i gat planti famili olsem dispela, bilong ol pablik sevan olsem ol haus sik, edukesen na polis woklain, na ol lain i wok wantaim Bogenvil Edministresen i stap long en.

**4 na 5 ATOLS TRENISIT HAUS:** Milreth Manoa, Claire Tekohu na Jerry Navari em tripela yangpela i stap wantaim ol famili bilong ol long Atols transit haus long Sohana Ailan. Ol i tok tenkyu long Not Bogenvil MP, Louta Atoi, husat i putim mani long sanapim dispela 8-pela rum haus we ol i ken stap na wetim sip i go bek long ples.

**6: KLAIMET SENIS:** Hevi long solwara i karim ol ailan na ples i kamap ples klia tu long Sohana Ailan olsemn dispela poto i soim. *Ol Poto: Veronica Hatutasi*



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.
6:30am - Nius Hetlains
6:45am - Bonde grtins
7:00am - Major Nius Bulletin - YUMIFM Nius Senta
7:05am - YU TOK - komiuniti awenes program
7:15am - WAN 4 DA ROAD - Hit Prediction
- niupela singsing
7:30am - Tok Pilai - stori b'long putim smail long nus pes.
8:00am - Major Nius Bulletin - YUMIFM Nius Senta
8:05am - YU TOK - komiuniti awenes program
8:15am - "Papa Heni Fuka Show".
9:00am - Nius Bulletin - YUMIFM Nius Senta
9:15am - Luksave long Komuniti (Radio Pilai) Fraidei

Tasol
9:30am - Final aua cruz
10am - 3pm - Morin Trek na Belo Pack
- Host: Mummy DASH
10:00am - Major Nius Bulletin - YUMIFM Nius Senta
10:05am - YU TOK - komiuniti awenes program
10:15am - Kona b'long yu.
10:45am - YUMI PANIM WOK Segment
11:00am - Nius - YUMIFM Nius Senta
11:05am - YU TOK - komiuniti awenes program
11:10am - Lukautim yu yet - Helt toktok
11:30am - Nius Hetlains b'long Belo Taim
- Laik b'long yu - Niupela singsing previu
12:00pm - Major Nius Bulletin - YUMIFM Nius Senta
12:05pm - YU TOK - komiuniti awenes program
12:10pm - BELO Pack - Belo taim rekwes na dedikesen
12:15pm - Komuniti Notis Bod
12:20pm - BELO Pack - Belo taim rekwes na dedikesen
1:00pm - Nius - YUMIFM Nius Senta
1:05pm - YU TOK - komiuniti awenes program
1:10pm - BELO Pack - Belo taim rekwes na dedikesen

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie
3:00pm - Nius - YUMIFM Nius Senta
3:05pm - YU TOK - komiuniti awenes program
3:10pm - Avinun cruz
4:00pm - NIUS - YUMIFM Senta
4:05pm - YU TOK - komiuniti awenes program
4:10pm - FOAPELA KAM GUD LONG 4 - foapela singsing
4:30pm - Nius Hetlains
4:45pm - YUMI PANIM WOK Segment
5:00pm - Major Nius Hetlains - YUMIFM Nius Senta
5:05pm - YU TOK - komiuniti awenes program
5:10pm - 6:00pm - KULCHA Musik (1 hr) skeim lokal musik 6pm - 7pm
- NAIT BEAT - Host: Vaviessie
6:00pm - MAJOR NIUS BULLETIN
- YUMIFM NIUS Senta
6:05pm - YU TOK - komiuniti awenes program

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
- Host: Angra Kennedy
7:00pm - Nius - YUMIFM NIUS SENTA
7:05pm - YU TOK - komiuniti awenes program
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Tuluvan Vitz/Talaigu Sopi/Bata Rat
00:00 - Early Monin Taim Cruz (ol lain brukim tulait shift)
- Musik / Request / Tok pilai
- Kipim Kampani long ol nait shift.
Wikens - Sarere
6am - 10:00am - Wiken Sanrais Host: Talaigu Sopi
7am - 9am - Sarere Monin Cruz
9am - 11am - Monin Treks
11am - 1pm - National Weekly Hit Parade - Host: Kasty - 1st aua NWHP
12:00pm NIUS - YUMIFM Nius Senta
12pm - 1pm - 2nd aua NWHP

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm NIUS - YUMIFM Nius Senta
2pm - 6pm - Sarere Avinun Cruz
6:00pm NIUS - YUMIFM Nius Senta
6pm - 00:00am - Nait beat
7pm - 9pm - Coca Cola Garamut
9pm - 00:00am - Nait cruz
00:00am - 6am - Brukim Tulait Show
Wiken - Sandei
6am - 10am - Wiken Sanrais / Sandei Monin wokabout Musik
10am - 12noon - Monin Treks
12noon NIUS - YUMIFM Nius Senta
12 - 2pm - Sandei Belo Taim Music
2:00pm NIUS - YUMIFM Nius Senta
2pm - 6pm - Sandei Avinun Draiv Music
6pm - Nius - YUMIFM Nius Senta
6pm - 8pm - GOSPEL REKWES AUA
8pm - 00:00am - Late Nait Cruz - Poroman Aua
00:00am - 6am - Brukim Tulait Show
Program Director - YUMIFM - Kasty

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas
7PM Stesen Op
7:01PM Ol Hetlain na Progre Priviu
7:15PM Spots
7:30PM Nius na Karen Afecas
8PM Helt
8:15PM Musik
8:30PM NIUS
8:40PM Spots Riplei
8:55PM Musik
9PM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas
7PM Stesen Op
7:01PM Ol Hetlain na Progre Priviu
7:15PM Musik na Chit-Chat
7:30PM Nius na Karen Afecas
8PM Mama Graun
8:15PM Musik/Spots
8:30PM NIUS
8:40PM Helt Riplei
8:55PM Musik
9PM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas
7PM Stesen Op
7:01PM Ol Hetlain na Progre Priviu
7:15PM Musik na Chit-Chat
7:30PM Nius na Karen Afecas
8PM Focus
8:15PM Musik/Spots
8:30PM NIUS
8:40PM Mama Graun Riplei
8:55PM Musik
9PM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas
7PM Stesen Op
7:01PM Ol Hetlain na Progre Priviu
7:15PM Musik na Chit-Chat
7:30PM Nius na Karen Afecas
8PM Youth
8:15PM Musik/Spots
8:30PM NIUS
8:40PM Focus Riplei
8:55PM Musik
9PM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6:30AM Nius na Karent Afes
7AM Stesen Pas
7PM Stesen Op
7:01PM Ol Hetlain na Progre Priviu
7:15PM Musik na Chit-Chat
7:30PM Nius na Karen Afecas
8PM Wantok
8:15PM Musik
8:30PM NIUS
8:40PM Youth Riplei
8:55PM Musik
9PM Stesen Pas

SARERE - Nait
7PM Stesen op - Ol Nius Hetlain/Progre Priviu
7:05PM Musik na Chit Chat
7:30PM Nius
7:40PM Wantok
8PM Lokal Ben
8:30PM Nius
8:40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Progre Priviu
7:05PM Musik na Chit Chat
7:30PM Nius
7:40PM Femili Blong Serch (Radio Plei)
8PM Lukluk Bek Long Wik
8:30PM Nius
8:40PM Musik/Chit Chat
9PM Stesen Pas

EMTV Television Guide

Table with columns for dates (MANDE FEBRUERI 10, 2014; TRINDE FEBRUERI 12, 2014; FONDE FEBRUERI 13, 2014; SARARE FEBRUERI 15, 2014) and program listings for various times (4:00 AM G, 5:00 AM G, etc.) including shows like AUSTRALIA NETWORK, JOYCE MEYER, NEWS REPLAY, and TRAPPED CASTAWAY.

Singsing Kwaia em bilong SDA

Nicky Bernard i raitim

SINGSING bilong nau yumi save yusim ol gita na kibod long senisim nek bilong yumi go antap na kam daun taim yumi singsing. Long bipo nogat, nek tasol save mekim olgeta nois taim yumi singsing. Taim bilong lotu tu nek tasol bai yumi harim ples klia stret, husat singsing long bes, soprano na alto. Dispela taim nau em ol musik instramen kam insait na nek bilong ol manmeri singsing i wok long go hait long ol musik samting.

Ol Seven De Sios i strong dispela Kwaia nek i stap yet, ol i no save pilai long instramen na singsing, nek bilong ol yet i mekim olgeta wok. Planti bilong ol yangpela SDA i strongim dispela kwaia stail singsing i stap yet. Long wik i go pinis sampela yangpela bilong Rainbow SDA sios i traim nek bilong kwaia bilong ol taim ol go bungim bikman bilong sios bilong ol i kam long Amerika. Dispela nek bilong ol i mekim olgeta wok long bes, soprano na alto. Dispela i opim ai bilong planti manmeri long dispela taim.



Ol yangpela yut bilong Rainbow. Poto Nicky Bernard.

Raun wantaim Wantok Kru...



# TORO



# BIABIA



# KANAGE



# KROSWORD

- Antap
- 1 Ples long Lihir
- 5 Wantok na Post-Courier em tupela
- 12 Namba wan kaikai bilong Asia
- 14 Haus bilong salim ol samting
- 15 Biktaun long Morobe
- 17 Tenkyu
- 19 Narapela nem bilong Persia
- 21 Kolpela switkai
- 24 Bung bilong ol skul sumatin
- 27 Lewa bilong masin
- 30 Vairas i ken kamapim sik AIDS
- 31 Binen
- 32 Tuna
- 34 Mak bilong kompas
- 35 I no inap
- 36 Mani masin
- 38 Wara bilong nus
- 40 Luksave mak
- 43 Naispela krai bilong ol kain samting olsem gita
- 45 Tumbuna bilas
- 46 Namba faiv mun
- 47 Saut Is win
- 49 Wanpela sik
- 51 Riva long Madang
- 54 Ples san i kamap
- 56 Ples pulap long samting
- 57 Namba wan
- 59 Kampani bosim Lihir gol main
- 60 Sos
- Daunbilo
- 1 Kirap nogut
- 2 Givim samting bilong amamasim narapela
- 3 Yau
- 4 Dring wantaim suga
- 6 Kokopo i stap long dispela hap bilong Nu Briten
- 7 Ples long Nu Ailan
- 8 Bilas bilong lek
- 9 Kaikai
- 11 Strongpela metal
- 13 Ol sik olsem AIDS
- 16 Bilong lukluk
- 18 Moning taim
- 20 Pipia man
- 22 Putim ol toktok long pepa
- 23 Paradais
- 24 Nois yu mekim long taim yu tait
- 25 Pekato
- 26 Taim Jisas i kirap bek
- 27 Namba
- 28 Saut Australia
- 29 Iektoret long Wes Sepik
- 31 Givim pawa long tos
- 33 Ailan klostu long Kavieng
- 37 Yam
- 39 Solwara i kirap
- 41 Narapela man ya!
- 44 Grup bilong ol sumatin
- 48 De bipo long tude
- 50 Ples bilong dring
- 51 Hansut
- 52 We tit na tang i stap
- 53 Mani bilong wok
- 55 Intenel Revenu Komisin
- 57 I no kalabus
- 58 Salim toktok long mobail

# SUDOKU

8	1	2	9	7	3	4	5	6
3	5	9	4	2	6	8	1	7
7	6	4	8	1	5	9	3	2
9	7	6	1	4	8	5	2	3
4	2	5	3	6	7	1	9	8
1	8	3	2	5	9	7	6	4
2	9	7	6	8	1	3	4	5
6	3	8	5	9	4	2	7	1
5	4	1	7	3	2	6	8	9

Ansa bilong las wik Sudoku # 31

2	7		3			5		
		5		2		7	1	
6	8		1		7	3		
5					6			9
			5	9	4			
9			2					3
		1	3		9		6	8
	3	2		6		4		
8			4			5		7

Ansa bilong Sudoku # 32 neks isu

P	U	T	P	U	T		S	T	O	P		O	P
E	N	I		N	A	U		O	D	A			I
N		S	A	I	N			B	I	S	N	I	S
	T	A		G		T	I	T		O		I	
K	A		L	M	A	L	A		A	N	I	A	N
I	N	F	O			O	N	A					S
	G		W	I	N				Y			L	
K	E	L	A			D	I	W	A	I		A	
O	T	O			T	O	S		S	A	P	I	M
N		T		G	O	L		A		S	T	A	
T	I				K	O	M	I	T	I			I
R	A	S	T	A		V		L	U	S		A	M
A		R		G	I	T	A		T	U	N	A	
K		R	I	P	O	T		N	O	A		A	I

Ansa bilong las wik krosword isu # 2057

1		2	3	4		5	6	7	8	9	10		11
			12			13		14					
15	16					17	18				19	20	
21				22						23			
									24	25			26
31			32			33		34			35		
36		37				38		39		40	41	42	
47	48			49	50			51		52			53
54				55				56				57	58
59										60			

# Raun wantaim Kanage olgeta wik



**Teksim Wari, Tingting, Painim Pren, Wantok o Pas bilong yu i kam nau..**  
**Digicel namba: 7235 6149**

**Dia Wantok Nius**, wari bilong mi i olsem, planti hevi i kamap long hombru o stim na drak so nogat inap polisman long ilektret na provins so inap Is Sepik Provinsel Gavman i putim ol eksilari polis kam bek long wok, ol bin wokim gutpela wok. Tenkyu.

**Dia Wantok Nius**, nem bilong mi Linda Siau Hikor. Mi bilong Wes Kerema (Ihu) na mi marit long Simbu – Kerowagi. Mi lus kontek wantaim ol lain bilong mi long Mosbi na Kerema. Plis ringim mi long dispela namba 7208 9077 na mi ken stap wantaim yupela.

Tenkyu, Linda - 02/02/2014

**Dia Wantok Niuspepa**, mi man na mi bilong nebilyer long WHP. Mi amamas long toktok bilong jastis ministra Mr. Kerenga Kua em kamap long *Wantok Niuspepa*, long Novemba 28, 2013. EM i tok long gavman bai sainim planti ol nupela lo bai kamap long neks yia olsem na mi gat bikpela amamas. Em tasol, tenk yu.

06/01/2014

**Dia Wantok Nius**, mi wari olsem planti bilong ol manmeri insait long kantri bilong yumi PNG. Laip bilong ol i bagarap pinis long ol yus bilong ol mobail fon tasol, bikos paul pasin long marit manmeri na yangpela i kamap bikpela tru insait long famili na haus lain tu. So PNG gavman inap lukluk long ol dispela kain hevi wok long kamap long kantri na minimaisim na kontrolim ol Bisnis Hed Grup long wokim ol seils bilong mobail fon insait long kantri bilong yumi long stopim ol kain hevi long PNG em wanpela Kristen kantri.

**Dia Wantok Nius**, *Wantok Niuspepa* i olsem gutpela sevis long yumi ol lain i no save long tok Inglis. Em tasol na husat i laik sapot yu welkam.

Albert Ake, WHP - 17/01/2014

**Dia Wantok Niuspepa**, mipela papa mama bilong Begesin long Madang provins i no amamas long wanem Brahman sekenderi skul i no save kisim stret ol pikinini bilong Usino Bundi na Gama i go long Braaman. Em i save kisim ol Katolik pikinini bilong arapela distrik tu i save i go skul long Brahman sekenderi. Dispela pasin ol i stret, mipela i askim gavman long kirapim wanpela haikul long Begesin na dispela i ken helpim olgeta pikinini bilong Usino Bundi na Gama stret. Mipela i askim Upper Ramu distrik DA wantaim edministresen tim bilong em long lukluk long dispela wari bilong mipela. Tenk yu!

Ezekiel Tai Ono, Begesin – 05/02/2014

**Dia Wantok Nius**, mi laik soim bel hevi na wari bilong mi long Madang Provinsal Gavman wantaim Open memba bilong Raikos. Olsem wanem na ol no gat luksave long mipela. Tenk yu!

**Dia Wantok Nius**, mi salim bel hevi bilong mi go long ol memba olsem gavana Powes Parkop tok long buai ban long NCD long TV. Mi lukim ol memba na ol man wan wok long kaikai na toktok long TV ya ol waitman tu was long Tv na lukim kantri stap. Man mi lukim long TV ol memba ol i laik toktok long ol pipel maus bilong ol i ret tru. Powes i no stopim ol. Yupela giaman long palamen i stap. Em tasol, tenk yu!

Mulange Samu – 11/02/2014

**San na mun**

Kanage wantaim poroman bilong em Orike pilai snuka long haus bilong Kanage. Sampela meri Kerema go long haus bilong Kanage long kisim wara long paip wara bilong Kanage long wanem ol nogat wara long hap bilong ol. Orike lukim ol meri Kerema wokabout go arere long haus na em giaman na tokim Kanage, "Aiyo, perendo! Bikpela kus stret pas long trausis bilong yu ya!" Kanage paul olgeta na hariap tru wanem trausis bilong em. Ol meri Kerema lukim Kanage sanap as nating na wanpela bilong ol tok, "Aiyo, san tasol bikpela mun kam aut." Kanage harim olsem na bekim, "Sapos mun i sain long ai bilong yu, yu bai tingting na pilim olsem yu stap long mun ya." Meri ya harim bekim bilong Kanage na em tok, "Ating mun ya i mas i gat strongpela lait bilong paulim tingting bilong man gen ya."

**Wopa Mote Mosbi.**

**Husat i papa?**

WANPELA meri Yauro i go stap long Australia i go na kam bek long ples bilong em. Taim em i kam bek long ples, em i gat bel. Em nau ol bik man long ples i bung na sindaun toktok long painim aut husat i givim em bel. Taim ol bikman i askim meri yah, em i no toktok. Long wanem meri yah i no save long tok ples na tok pisin,



em save long tok inglis tasol. Ol i askim i go nogat na Kanage i kirap na askim meri ya olsem, "Who bel yu?" Taim ol bikman i harim Kanage i tok olsem, ol i holim pasim bel bilong ol na sindaun i stap. Mekim na meri Yauro ya sem pipia stret.

**Gwen Toroks MADANG.**

**Yu laki man ya**

KANAGE tokim liklik pikinini bilong em long go baim mutrus bilong em na pikinini tok em i les. Em nau Kanage belhat na kirap paitim em. Meri bilong Kanage harim pikinini kra i na em i siksti kam ausait long haus na askim Kanage. "Kela bun bun, yu pitim nating pikinini long wanem?" Kanage kirap na tokim meri bilong em olsem. "Mama yu noken askim mi dispela kwesten, samting mi wok hat na dispela pikinini kamap, olsem na sapos em i bikhet, mi gat olgeta rait long paitim na skulim em." Em nau meri bilong em kros na kirap tokim em. "Dispela wok bilong

wok hat na kamapim ol pikinini yu save tumas. Tasol long wokabout i go na baim mutrus yu pilim skin les." Meri bilong em i tok olsem na mekim Kanage i belhat na kros nogut tru, na i kirap tokim meri bilong em. "Gutpela tru na yu kam maritim mi, na yu stap gut olsem na yu hambak. Ating sapos papa antap i no wokim mi, bai yu painim man i go nogat na bai yu go poromanim wanpela dok man na karim dispela yau pas pikinini ol i save kolim hapkas dok na sipsip.

**Friedson Kipas BULOLO, LAE.**

**Toktok gut ya!**

KANAGE i bilong ples Butibam long Lae Siti, na em i maritim wanpela meri Okapa na ol stap long ples bilong meri bilong em longpela taim tru. Wanpela taim tupela i kalap long PMV bas na i laik go long Lae. Bas i go kamap long Makam veli na meri bilong Kanage i askim em, "Ngan bron mi, yu ting orsem wanem Rai i kam krostu pinis o nogat?" Kanage bekim na tok, "yu kolim gut, i no Rai-Rei." Ol narapela pasindia long bas harim olsem na kirap tokim Kanage, yu tu kolim gut, i no Rai-Rei nem bilong ples em Lae." Kanage harim olsem na spet long windo bilong glas.

**Norbert Berere Stoneth MADANG**

**Ol skwat! Teksim ol gutpela Kanage tok pilai i kam long: Txt: 72356149**

# Ol poroman i tok pilai tumas long mi bikos mi patpela tumas

**Dia Laiplain,**

Mi traim planti rot long traim lus weit o lusim skin bikos mi patpela tasol em no wok. Mi wokim planti eksasais, kisim marasin long kemis, yusim ol kanaka marasin, no kaikaim ol gris kaikai, wok nait, smuk planti na daunim mak bilong wara mi save dring long en.

Ol poroman sumatin i tok pilai tumas long mi na mi pilim sori. I gat narapela rot o ol narapela marasin i ken helpim mi long lusim skin na stap bun?

**Desperate to Loose Weight**

**Dia Pren**

Mipela i luksave olsem yu no amamas na yu no pilim gut, moa yet, taim ol narapela man meri i tok pilai long yu olsem yu patpela. Yu mas save pinis olsem sampela lain i save hariap long kamap patpela na sampela em bai nogat, maski ol i kisim planti kaikai. i luk olsem yu stap long nambawan grup na i min olsem yu mas mekim samting long lusim skin, o yu no ken putim moa skin.

Yu tokim mipela long planti ol samting yu save wokim long lusim skin. Dispela em ol gutpela tingting, tasol i gat sampela samting mipela i no wanbel wantaim.

Pastaim, yu tok yu stopim yu yet long dringim planti wara. Mipela i luksave olsem dispela i no gutpela samting long yu mekim long en. Yu no nap go patpela taim yu dringim planti wara. Bodi bilong



yu i save yusim planti wara bikos em i nidim em na dispela em i no yusim em save rausim olsem pispis. Ol dokta i tok planti manmeri i no wok long dringim inap wara insait long wanwan de. Wanpela man i sapos long dringim 8-pela glas wara long wanpela de.

Long keis bilong yu, i gutpela long yu i dringim moa wara bikos dispela bai helpim yu long klinim bodi na ol pipia samting yu no nidim long en. Olsem i gutpela yu bihainim edvais bilong dokta na dringim 8-pela kap wara olgeta de.

Narapeal samting yu tok yu mekim em yu smok planti i stap. Sapos yu save smokim moa long 20 sigaret long wanpela de, yu gat bikpela sans long kisim lang kensa. Tasol yu ken kisim tu sapos yu no smokim planti sigaret. Mipela i bilip olsem yu bai lusim smok olgeta.

Yu eksasais planti na dispela em i gutpela sapos yu wokim rait eksasais. Mipela i askim yu long go long wanpela ples bilong eksasais na toktok wantaim bos long dispela ples long wanem kain eksasais i gutpela long yu.

Yu tok yu save kisim ol tablet marasin, tasol yu no tok wanem kain stret. Yu

askim mipela tu long tokim yu long wanem kain marasin yu ken kisim, tasol mipela i no ol rait lain long tokim yu. Yu mas go lukim dokta bikos em bai skelim na glasim yu gut na givim yu ol rait edvais long mekim wanem samting, na long kisim ol rait marasin. Em bai wokim ol tes long lukim as long yu go patpela na rot we yu ken bihainim ol program long lusim skin.

Pren, i luk olsem yu traim planti samting long traim lusim skin, tasol bodi bilong yu i no senis yet. Sapos yu wok long mekim eksasais na kaikaim ol rait kaikai, noken wari long ol toktok ol narapela manmeri i wokim. Yu traim hat long mekim stretpela samting long lusim skin. Ating Bikman i mekim yu olsem o, sapos yu man bilong laikim stret kaikai, tasol go het long ol program na ol samting yu wokim long lusim skin.

**Pren bilong yu**

**Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.**

**Laiplain**

# Bikpela wok i stap yet long NFA

**Frieda Sila Kana i raitim**

OLPELA Menesing Dairekta bilong Nesenel Fiseris Atoriti (NFA) Sylvester Pokajam, i tok em i gat planti bikpela wok bilong bisnis i stap yet long mekim insait long NFA tasol gavman i mekim disisen bilong em pinis.

Long taim bilong givim wok i go long nupela MD, Mista Pokajam i tok, em i bilip olsem ol gutpela man i mas menesim ol institusen bilong gavman na wok bai ran gut.

“Ol Yunaitet Nesen, USA, Saina, Japan, i save harim tok bilong mi na i save daunim ol yet long PNG bikos long tuna prodak bilong yumi. Kain ogenaisesen olsem NFA i mas sanap indipenden long mekim wok. Long PNG em i NFA tasol i save givim ol laisens long ol fiseris bisnis, tasol long ol

narapela kantri long Esia ol-geta bikpela na liklik han bilong gavman i save givim laisens, olsem na ol i save pinisim tru ol pis long solwara bilong ol,” emi tok.

Mista Pokajam i tok lukaut olsem, “EU em i wok long lukluk klostu tru long yumi long lukim olsem yumi bi-hainim lo bilong IUU na SES o nogat. Spain i no amamas tumas long wok bilong tuna long PNG. Ol save lukluk long NFA i mas sanap bilong em yet long mekim wok, na gavman i mas no ken mekim nabaut long wok bisnis bilong em.”

Mista Pokajam i tokaut olsem long taim bilong em i bin gat 600,000 metrik ton bilong 2.3 bilien tuna i go aut long tred. Insait long 12-pela yia em i wok wantaim NFA, em i wanpela tasol i gat save long wok bilong Akauntan na i no gat narapela wokman i

lainim wok bilong em.

“Em i kampani bilong gavman. Mi amamas tasol bilong wanem bai mi no moa gat bikpela wari na tingting planti,” em i tok.

Long wankain taim, nupela MD, John Kasu i givim luksave bilong em long olpela MD. Planti samting i bin kamap long taim em i bin stap olsem bos bilong NFA. Planti wok i kamap long intenesenel eria. Em i tok tenkyu long Sylvester Pokajam olsem man i save givim tingting long em na em tok tenkyu long lidasip bilong em.

“Em i tru olsem Mista Pokajam wanpela tasol i gat eksperiens long akaunting. Mi tenkyu long gavman long makim mi, na mi tok promis long wok bung wantaim NFA bod. Mi gat bikpela bilip long ol NFA tim nau i stap,” em i tok.



L-R Pastaim Menesing Dairekta bilong NFA, Sylvester Pokajam i sekhan wantaim nupela Menesing Dairekta John Kasu las wik insait long konprens rum bilong Nesenel Fiseris Opis long Pot Mosbi.

## EHP Gavana i stretim ol liklik rot

**Sape Metta i raitim**

OL liklik han rot i save joinim ol hauslain na distrik long provins i go long Goroka bik-taun bilong Isten Hailans bai lukim ol masin i stretim ol dispela rot nau.

Gavana Julie Soso Akeke husat i kisim pinis bikpela trakta masin na ol arapela ik-wipmen long mekim ol wok bilong stretim gut ol dispela rot.

Na siaman bilong nupela bisnis han bilong provinsal gavman – Isten Hailans Provinsal Propeti Delopla (bipo Nokondi Invesmen) Michael Gotaha bai i go pas long lukautim dispela ol masin na ikwipmen.

Mista Gotaha i tok dispela ol masin na ikwipmen i bilong ol pipel, olsem na ol wokman

bai yusim dispela ol samting long mekim wok developmen na bringim sevis i go daun long ol pipel long provins.

Em i tok ol pipel long provins bai i ken lukim planti senis i kamp long ol rot sistem we provinsal gavman bai yusim dispela ol masin long stretim gut ol rot.

Gutpela rot bai i ken helpim ol pipel long muvim ol kago samting olsem kopi na ol arapela egrikalsa bisnis bilong ol i go i salim long taun.

Mista Gotahai tok, Gavana Akeke i kamapim nupela samting we ol arapela lida na politisen bipo i no bin kamapim.

Gavman bilong Misis Akeke bai go het long kamapim moa developmen long provins long taim em i holim wok bilong gavana.

## Manus i laikim dil bilong em yet long asailam sika

**Stanley Nondol i raitim**

Gavana bilong Manus, Charlie Benjamin, i tok PNG na Australia gavman i mas kamapim wanpela agrimen long givim ol sevis aninit long Asailam Sika i go long Manus.

Mista Benjamin i tok Manus i no kisim inap sevis long developmen na tok wanpela agrimen i mas kamap gen long givim luksave long Manus em yet na i no putim PNG gavman na kantri long kisim ol sevis long Asailam Sika dil long Manus.

I gat ripot olsem ol bikpela wok kontrak long bikpela milien kina long helpim mani bilong Australia na i go long ol kamapni bilong Australia.

Planti komplek i kamap pinis long tupela memba bilong Manus Mista Ronney Knight na Mista Benjamin olsem ol pipel long Manus i kisim liklik sevis na ol bikpela kontrak go long Australia kamapni.

Praim Minista Peter O'Neill i tok as tingting bilong putim

Asailam Sika long Manus em long ol papagraun na manus provinsal gavman bai kisim ol sevis llong mani bilong Australia na PNG gavman.

Dispela dil i lukiim Australia gavman i givim moa long A\$ 420 milien long ol wok developmen.

Mista Benjamin i tokim palamen olsem Manus i no gat disisen long ol mani go long long provins long dil bilong Asailam Sika.

Foren Afes Minista Rimbink Pato i tok gavman i gat bikpela luksave long ol papagraun bilong Manus na ol bai kisim sevis aninit long agrimen bilong Asailam Sika.

Memba bilong Goroka Bire Komisopa i tok, gavman i mas gat bikpela luksave long Manus provins.

Mistas Kimisopa i tok Manus i gat rait long go pas long ol wok developmen bilong Asailam Sika senta na ol mani bilong developmen long nem bilong Asailam sika.

Mista Kimisopa i tok



Wanpela asailam sika i sanap autsait long haus bilong ol long Manus ditensen senta. Foto ABC

Manus pipel i gat rait bikos em graun bilong ol na gavman i mas larim ol yet mekim disisen long mani na ol arapela developmen samting bilong Asailam Sika.


Wankain taim, Australia Foren Minista Julie Bishop taim i kam long kantri las wik i tok Australia gavman i givim mani long ol pipel bilong Manus na PNG bai kisim sevis aninit long agrimen.

Tasol i gat ripot olsem ples

bilong ol Asailam Sika long Manus i no gutpela long ol manmeri bai stap. Ples i bagarap, toilet i bagarap, na ol i ken painim sik.

Dispela i lukim ol save man i tok PNG na Australia gavman i asua long human raits lo.

Oposisen lida Belden Namah i salensim dispela long kot na kot i givim tok orait long em bai go het long harim bikos i gat as i stap.



# DIRECT FLIGHTS RABAUL TO CAIRNS!

With connections to and from Kavieng and Hoskins

### OUR SCHEDULE

MON PX032 RAB-CNS 08:20 11:20  
PX031 CNS-RAB 11:50 14:50  
FRI PX032 RAB-CNS 08:10 11:10  
PX031 CNS-RAB 12:30 15:30

Call Toll Free on **180 3444** or contact your nearest Air Niugini Travel Centre or Travel Agent for further details.



**Air Niugini**

www.airniugini.com.pg

# Maining, oil na ges bai pinis tasol egrikalsa bai stap yet

### Stanley Nondol i raitim

**OIL, ges, gol, kopa wantaim ges i kam long dispela bilien kina LNG projek bai pinis wanpela de, tasol egrikalsa bai stap yet na sapotim bikipela populesen bilong kantri long planti yia bihain. Gavman i mas putim bikipela mani long egrikalsa na kirapim planti bikipela projek long sapotim bikipela populesen.**

Dipatmen bilong Egrikalsa na Laipstok i tok egrikalsa i sapotim 85 pesen bilong moa long 7 milien populesen bilong kantri na i mas kism bikipela luksave bilong gavman na ol praivet kampani na kirapim moa egrikalsa projek long sapotim ol pipel long planti yia bihain. Minista bilong Egrikalsa Tommy Tomscoll i givim toklukaut olsem populesen bilong kantri i gro long 2.5 pesen na dispela em bikipela

namba tru na gavman i kism taim long kontrolim. Em i tok populesen i gro hariap tru na moa long 6. 5 milien i stap long ples na egrikalsa i sapotim laip bilong ol. Mista Tomscoll i tok bihain long 5 na 10 yia pupulesen bai gro bikipela moa bikos gavman i no gat lo long kontrolim populesen. Em i tok bikipela populesen tru bai kism strong long

egrikalsa long laip bilong ol. Minista Tomscoll i tok planti ol yangpela i pinis long skul olsem yunivesiti na koles tasol ol i no inap long painim wok. Tasol em i tok egrikalsa i redi long givim wok long ol dispela lain. "Gavman i putim fri edukesen na ol papamana i les long wok long kopi, kakao na ol gaden bilong ol na i les nabaut bikos gavman i rausim wari bilong baim skul fi. Tasol dispela bai kamap

sotpela taim tasol na ol i mas tingim bihain taim bilong ol." Mista Tomscoll i tok. Mista Tomscoll i tokaut tu olsem gavman i givim tok orait pinis long kirapim K900m deiri fam long Sentral provins. Mista Tomscoll i tok ol tok-tok i wok long kamap namel long divelopa, provinsal na nesanel gavman projek bai kirap long pinis bilong 2014. Mista Tomscoll i tok tu

olsem gavman bai mekim bikipela invesmen long Sepik Welpam projek long Sepik plein. Dispela projek i kism tokorait pinis na long gavman na i stap insait long 2014 baset. Minista Tomscoll i tok olgeta pipel wantaim provinsal na nesanel gavman i mas sapotim na strongim wok egrikalsa bikos egrikalsa inap long helpim bikipela populesen bilong kantri nau na long bihain taim.

## Moa ovasis turis sip bai sua long Madang

OL OVASIS turis bai pulap long Madang taun stat long Sande, Februari 16, taim wanpela bikipela turis sip 'Silver Whisper' i kam sua long Yamilon basis long Madang taun. Madang Visitas na Kalsarel Bureau (MVCB), i tokaut las wik long ol wok redi na program bilong dispela bikipela turis sip long Madang. Ekting Dairekta bilong MVCB, Jane Naso i tok dispela bikipela sip 'Silver Whisper' em wanpela bikipela sip tru na em i wanpela 7-star hotel stret we i save ran long solwara na em i gat biknem long krus sip bisnis long wol. Mis Naso i tok dispela bikipela turis sip bai kamap long Sande, Februari 16, na Melanesian Turis Sevises (MTS) i redi long putim wanpela liklik festival we ol bai putim wanpela tumbuna kanu ol i kolim 'Balebpat' ol lain long Bilibil long saut-kos i bin wokim long las yia long redim bilong PNG Inde-

pendens De selebresen. Dispela tumbuna kanu i gat tupela mas bilong en wantaim dabol kanu 12-mita longpela, na em bai lusim Bilibil viles i go kamap long Madang Risot Hotel long givim welkam long ol pasindia o turis i kam long 'Silver Whisper' Mis Naso i tok tu olsem bai i gat program bilong 15 kalsa grup i soim ol tumbuna singsing na danis arere long naispela plaua gaden na solwara long ai bilong Madang Risot Hotel. Bai i gat mumu kaikai em ol lain turis i ken teistim kaikai bilong PNG. Dairekta bilong MVCB, Mis Naso i tok tu olsem long Februari 23, Madang bai lukim gen narpela bikipela turis sip nem bilong en 'ms Amsterdam' i kam sua wantaim moa long 1,000 turis manmeri. I gat wok redi i stap pinis long dispela ol turis i mekim lukluk raun i go long ol lokal viles long Madang. Mis Naso i tokaut tu olsem ol

arapela bikipela turis sip we bai i go sua long Madang em 'Caledonian Sky, Oceanic Discoverer, National Geographic Orion II, Silver Explorer, Silver Discoverer na Professor Khmonov. Ol dispela bikipela turis sip bai kam wantaim ol turis manmeri long Madang namel long mun Epril na Oktoka long dispela yia. Dispela sip Professor Khmonov i bin bungim hevi na pas long ais long las mun long Antarctic Osen. Mis Naso i tok MVCB bai tok save long ol lain atis o lain husat i save wokim ol naispela hendikraf, olsem kaving, nekles na ol tumbuna bilas na bilum long redim ol yet gut long salim ol samting bilong ol long ol turis i kam long Madang. Mis Naso i tok ol sumatin bilong Divain Wod Yunivesiti (DWU) bai stretim ol gaid o lain bilong toktok na soim ol lain turis raun long taun o long baim ol samting.

## Oil pulim K1.2 bilien winmani olgeta yia

### Stanley Nondol i raitim

GAVMAN i save kism moa long K1 bilien winmani long oil olgeta yia na i gat moa ges projek bai kamap long kantri. Minista bilong Petoluim na Eneji William Duma i tok kantri i gat bikipela ges na oil i stap yet na gavman i mekim bikipela nau long kamapim namba tri LNG projek kamap bihain long US\$19 bilien PNG LNG projek na Elk-Entelop ges projek long Galp provins. Minista Duma i tokim Lidasip Samit long dispela wik long Pot Mosbi olsem kantri i save kism namel long K1.2 bilien na K1.4 bilien olgeta yia long oil. Minista Duma i tok klostu bai namba tri LNG projek i kamap. Em i tok PNG gavman i toktok yet wantaim kampani bilong Japan, Mitsubishi long kamapim namba tri LNG projek. Minista Duma i tok PNG gavman i toktok wantaim Japan pinis na i kamapim wanpela agrimen na dispela agrimen bai i go long kabinet long kism tok orait. Sapos Nesanel Eksekutiv Kaunsil (NEC) i givim tok orait bai gavman i tokotk wantaim ol papagraun na kanatri bai statim namba tri LNG projek. Em i tokaut tu olsem gavman bai wok bung wantaim divelopa long statim US\$ 700 milien Stanley ges fil long Westen Provins

Minista bilong Petroleum i no tok klia long wanem hap stret bai dispela projek i kamap. Mista Duma i tokaut tu olsem gavman i wok long toktok wantaim narpela kampani bilong Japan long US\$ 2 bilien projek bilong petrokemikel. Mista Duma i tok, PNG bai resis wantaim Australia long salim ges na oil i go long ol maket long Esia. Mista Duma i tok PNG i gat nem pinis long wol long kamap wanpela LNG ekspoting kantri. Em i tokim ol gavana, minista na ol bos bilong ol dipaten olsem maski kantri i gat nem nogut sampela taim long korapsen na lo na oda, ol investa i gat bikipela bilip long wok bisnis long PNG na i wok long investim bikipela mani long PNG. Minista Duma i tok klia olsem agrimen bilong namba tu LNG projek we InterOli i go pas long en bai stat klostu. Em i tok InterOil i bung wantaim Total SA na sapos dispela projek i stat bai pulim bikipela winmani kam long kantri na ol pipel bai kism sevis. Total SA Kampani i stap namba 5 ples long wol long oil na ges na i gat bikipela eksperiens na i tok orait pinis long wok wantaim InterOil long namba tu LNG projek. Minista Duma i tok God anap i givim bikipela blesing long PNG na ol jeneresen i kam bihain bai kiism gutpela sevis.



Dispela turis eria arere long Madang Risot bai lukim bikipela hendikraf maket na i gat festival bai kamap tu.



Dispela bot bilong MTS bai bringim ol turis long bikipela sip i go sua long MTS eria na Madang Risot.

# Prais bilong ges i antap long Esia

## Stanley Nondol i raitim

**INTEROIL i tok prais bilong ne-turel ges long Esia maket i antap moa long ol maket long wol. Na PNG na InterOil i ken kisim gutpela winmani long ges taim wok bisnis long kantri kamap orait.**

Wok bisnis bilong oil na ges olsem eksploresen na drilling na sampela moa i no isi. Em i save kisim bikpela taim na invesmen na bikpela hatwok tru i save kamap long kisim tok orait bilong gavman na kisim ol laisens.

InterOil i tok wok bilong painim ges i save winim planti mun tasol

PNG bai kisim gutpela bekim. Em i tok papagraun, gavman na investa i mas wok bung wantaim gutpela tingting na wok strong long lukim gutpela kaikai bai kamap long bihain taim.

InterOil i tok wok drilling bai stat long Mas 2014. Em i tok wok i stat pinis long Bobcat wel sait long Not Wes bilong Wabo stesin long Galp provins long mun Novemba. Dispela eria i gat nem olsem PPL 238 na em i wanpela bilong tripela eria we kampani i mekim eksploresen wok. I gat 4 milien hekta bilong graun long ol wok bilong eksploresen bai kamap long oil na ges.

InterOil i tok klia olsem bipo long ol i statim wok ol i save kisim tok

orait long gavman, na ol papagraun long wok long laisens eria bilong eksploresen.

Taim em i kisim tok orait ol i save glasim gut wanem hap tru bai ol i mekim dril na bihain ol i save kamapim wok bilong dril.

InterOil i tok em i bihainim ol dispela rot na kamapim dril long Novemba.

InterOil i tok em i stretim ples

long putim kemp na 30 wokman i stat wok. Na namab bilong ol wokman i go antap long 80. Sampela i kamap draiva bilong buldosa, ekskeveta na stretim graun bilong mekim kemp.

Dispela wok i pinis na ol helikopta i kisim ol samting bilong mekim kemp go insait pinis.

InterOil i tok taim olgeta wok i pinis bai 100 wokman i statim wok

long dril long wel. Ol bai dril i go daun olsem 3000 mita. Dril bai go het long de na nait wantaim na bai winim 3-pela mun.

Taim dril i pinis bai ol i testim wel na lukim sapos i gat oil na ges o nogat.

In terOil i tok em i laik painimaut sapos Bobcat i gat bikpela oil na ges long salim i go long ol maket long Esia.

## PNGSDP givim sea bilong OTDF long CMCA

PAPUA Niugini Sustainable Development Program (PNGSDP) long dispela wik i givim 25 pesen sea long Ok Tedi Developmen Faundesen i go long Komyuniti Main Kontinuesen Agrimen (CMCA).

Siaman bilong PNGSDP Sir Mekere Mourata i tok dispela pasin bilong givim sea i go long CMCA em i impoten tru long rot ol pipel bilong Westen provins i go insait long ekonomik na sosel developmen

"Gavman bilong mi save toktok olgeta taim long dispela taim em i kamapim lo bilong Ok Tedi Main Kontinuesen Nain Saplimenter Ekt long 2001 olsem ol pipel yet bai mekim disisen na save long rot bilong yusim mani bilong ol." Sir Mekere i tok.

"Tasol long sampela as dispela i no bin kamap," em i tok.

Tasol dispela presen bilong kampani i go long OTDF long sea i senisim dispela pasin. CMCA i makim ol pipel i kisim bagarap long pipia bilong main i go long OK Tedi riva na Flai riva. Nau ol dispela lain

bai yupela yet i save long mani bilong yupela na i ken yusim long helpim yupela yet." Sir Mekere i tok.

Sir Mekere i tok, "I moa gutpela long yupela pawa bilong mekim disisen i go go bikpela long yupela na yupela i ken kisim gutpela sevis."

Em tok klia olsem PNGSDP i gat wanpela sea na OTML i gat tripela long OTDF.

OTDF i kamap aninit long Ok Tedi Main Kontinuesen Nain Saplimenter Agrimen Ekt long helpim na lukautim ol komyuniti developmen projek bilong OTML.

OTDF i save lukautim moa long 100,000 pipel, dispela namba em i klostu long hap namba bilong populesen bilong Westen Provins.

Sir Mekere i tok ol dispela lain tasol em ol lain i mas kisim sevis bilong OTDF na i no ol arapela lain.

Sir Mekere i tok i gutpela long ol CMCA papagraun i luksave long ol mani na sevis bilong ol na dispela disisen bilong PNGSDP long givim sea long CMCA i ken opim ai bilong ol arapela long luksave long CMCA.

## Bismarck Ramu laikim O'Neill rausim SABL

BISMARCK Ramu Griup ( BRG) i singaut long Prais Minista Peter O'Neill long sapotim ripot bilong Komisyon ov Inkwairi siaman John Numapo na rausim olgeta SABL we bikpela graun bilong tumbuna i go long ol bisnis lain long stil pasin.

Mausman bilong BRG Rosa Koian i tok kampani i sapotim singaut bilong Mista Numapo long Mista O'Neill i mas rausim SABL na givim graun i go bek long ol papagraun.

Long ol ripot bilong ol NGO na SABL komisina Numapo ripot, moa long 5.2 hekta bilong Tumbuna graun long aninit long SABL program long nem bilong agro-forestri.

Ol bikpela bisnis, planti bilong em ol bilong autsat kampani i mekim ol kainkain dil bilong ol wantaim ol wokman bilong gavman na kisim bikpela tumbuna graun long nem bilong mekim ol egrikalsa bisnis.

Aninit long dispela ol i mekim ol bisnis na brukim lo bilong kantri.

Nesenel Eksekutiv Kaunsil i kamapim wanpela wok painim long dispela hevi na John Numapo i kamap siaman na wok wantaim tupela loya Nicholas Mirou na Alosia Jerowai tasol ol i no pinisim ripot long taim gavman I bin givim.

Biahain long gavman i askim ol tripela i givim wan wan ripot bilong ol yet na i no long grup olsem gavman i askim.

Prais Minista Peter O'Neill i tokaut bihain long kisim ripot bilong Numapo olsem gavman bai rausim SABL na olgeta graun bai go bek long ol papagraun.

Mis Koian i tok Prais Minista i mas erausim SABL bikos 66 pela bilong 75 lis graun we wok painim i kamap i soim olsem ol bikpela kampani i kisim graun long stil pasin.

BRG i laikim O'Neill gavman bai

- Rausim lis bilong SABL

- Givim graun go bek long kasta mari papagraun

- Kenselim olgeta Klerens Atoriti we ol i kisim long korap pasin

BRG i askim bilong wanem na gavman i no kwiktai mekim dispela taim komisyon i givim ripot pinis olsem em i askim long en bikos bikpela korap pasin i kamap long SABL na ripot i tok klia pinis.

BRG i tok em i no gutpela pasin long Mista Jerowai i no givim ripot bilong wok painim bilong em. Em i dispela psin i no gutpela bikos ol pipel i weit long lukim ripot.



Bobcat wel long Galp provins.

## Back to school?

A Westpac Personal Loan can help pay for your children's school fees.

You can also use it to pay for excursions and uniforms.

Find out how to apply today.



Call 322 0888

Email [westpacpng@westpac.com.au](mailto:westpacpng@westpac.com.au)

Visit [www.westpac.com.pg](http://www.westpac.com.pg)

Banking for generations.



# Ramu NiCo Projek bringim sosel-ekonomik senis

**M**ASKI olsem sampela liklik lain i wok long mekim kain kain toktok egensim Ramu NiCo Projek, tasol wok-mak em i kamapim long bringim divelopmen na senis long laip long sindaun blong ol liklik manmeri long Kurumbukari na Basamuk em bikpela tumas.

Dispela projek i senisim laipstail bilong ol pipel, we sampela i no save long westen divelopmen na teknoloji nau i ken lukim long ai bilong ol na tu gat sans long wok long kisim mani long helpim sindaun blong ol wantaim femili long komuniti bilong ol long ples.

Ramu NiCo Projek i bringim rot we em bikpela divelopmen tru long Kurumbukari, we long pastaim ol manmeri i save painim hat tru long wokabaut longwe rot long Palai maunten na katim Ramu Riva na go kamap long Usino-mausrot na kisim PMV na go long Madang. Tasol nau ol sevises i go stret long haus-dua bilong ol.

Long PNG em wankain stori tu bikos Ramu Projek em namba wan nikel Projek, we kampani i kamautim na kisim nupela mineral long graun we pastaim nogat kampani i wokim olsem bipo.

Kam bilong Ramu Nikel Projek givim gutpela sans tru long planti ol lokal manmeri long wok na kisim pei long sapotim sindaun bilong ol yet wantaim femili bilong ol long ples na hauslain. Sampela i ken tok olsem Ramu Nikel Projek i bringim lait i kam long turangu ol manmeri we sevises i no go long ol pastaim.

Narapela bikpela samting tu em Projek i givim sans long ol lokal lain long lainim sampela nupela samting o teknoloji em ol i no bin skul long en na na i no lainim bipo.

Long taim bilong konstraksen bilong Projek i kam inap tude prodaksen i kamap Projek i kisim ol wokman meri long ol wan wan eria bilong en long wok. Ol dispela lokal wok manmeri i wok yet na lainim planti ol nupela samting we bipo ol i no bin lainim.

Sampela yangpela bilong Usino-Bundi we KBK Main nau i stap long en i no bin wok pastaim. Tasol taim Projek i kamap long eria bilong ol, em i givim ol gutpela sans tru long go wok na lainim planti samting long wok.

Maski olsem planti ol lokal haia o lain wokman em kampani i kisim long ol klen na ol haus lain klostu long Projek, ol dispela lain i givim taim bilong ol long wok long sapotim Projek we i bringim senis na divelopmen long laipstail bilong ol pipel.

Antap long naispela kol ples bilong Kurumbukari maunten, Ramu NiCo i gat nikel/kobalt main bilong en i stap.

Dispela KBK Main i gat tripela bikpela eria o seksen bilong en we ol wokman i save wok long stretim ol graun nikel pastaim long em i

ron bihainim 135 kilomita slari paiplain i go long Basamuk Rifaineri.

Kam bilong Ramu NiCo Projek long Madang provins i opim tu ai na luksave bilong gavman long bringim sevis i go long ol ruel eria na pipel bilong Usino-Bundi na Raikos distrik wantaim ol sapot i kam long Gavman.

Minista bilong Maining, Byron Chan i makim Nesenel Gavman na i tokaut long ol stekholda olsem O'Neill-Dion Gavman i sanap baksait long strongim wanem wok gavman bai i kamapim insait long memorandum ov agrimen (MOA) bilong Ramu NiCo Projek. Dispela em bikpela samting tru.

Mista Chan i tok Nesenel Eksekutiv Kaunsil (NEC) i luksave pinis long bikpela wok divelopmen Ramu Projek bai kamapim na i tok-orait pinis long givim mani-sapot long Spesel Sapot Grent o Infrestaksa Grent i go long Madang provinsal gavman insait long Baset bilong en.

"Wankain tu, ol mani help bilong Gavman bai kam yet aninit long Nesenel Gavman Divelopmen Baset long bihain," Mista Chan i tok.

Gavana bilong Madang, Jim Kas i tok maski olsem pastaim em i gat sampela tingting nogut long DSTP teknolji we Ramu NiCo i yusim long rausim pipia blong en, nau em i save long wanem kain teknoloji kampani i wok long yusim na em stap baksait na sapotim projek.

Usino-Bundi MP, Anton Yagama i tok amamas long Ramu NiCo long sanap strong na wok yet na daunim planti salens long divelopim dispela wanpela nikel projek insait long distrik bilong em, na em i tok em bai sapotim divelopa Ramu NiCo long wok go het.



1



2



3



4

1. Lokal man ranim masin long BSK.

2. Ol yangpela lokal asisten opereta long KBK.

3. Ol mama i wok nau long KBK.

4. Bikpela intenesenel bris long Basamuk soim divelopmen.

RAMU NICO

## Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**'Wanpela Ramu NiCo, Wanpela Komuniti'**

# Kimisopa givim strongpela tok lukaut

**Sape Metta i raitim**

**NAU yet wok bilong lukautim samting olsem wan handet tausen (100,000) pipel bilong Goroka taun long lsten Hailans, i stap long han bilong nupela Goroka Eben lokal level gavman(GULLG) taun menesa, Harold Abori.**

Memba bilong Goroka long palamen, Bire Kimisopa i tok em i laik lukim gutpela pasin i mas stap tu long dispela opis aninit long lukaut bilong Mista Abori.

Long taim ol i bung long lukim nupela taun manesa i kisim wok, Mista Kimisopa i tok ol paul na stil pasin insait long ol ogenaisesen na ol ejensi aninit long nesanel gavman i wok long kamap bikipela tru. Olsem na em i laik lukim stret-

pela pasin bilong wok na lukautim mani i mas stap insait long opis bilong GULLG.

Em i tok, populesen bilong Goroka taun i bikipela tru nau. Na GULLG i mas wok strong long bringim gutpela sevis na lukautim gut ol pipel long distrik na ilektoret bilong em.

Mista Kimisopa i tok strong olsem, "Sapos mi painimaut olsem stil na paul pasin i stap long opis bilong GULLG, mi gat politikal pawa long rausim yupela ol wokman na meri husat i kamapim dispela pasin na senisim yupela."

Em i tok amamas long Mista Abori long kisim dispela wok bilong taun menesa na em i tok promis tu olsem em bai wok klostu na sapotim Mista Abori long ol wok na projek bilong kirapim Goroka taun.

## Usino-Madang rot i bagarap

**Mathew Yakai i raitim**

OL manmeri husat i save go kam long Madang na Ramu i wok long lukim rot bilong ol i bagarap. Na i no longtaim ol manmeri husat i stap long ol arapela provins olsem Morobe, na ol Hailans provins bai no gat rot long go long Madang.

Nau i taim bilong ren na ol bris i bruk, planti graun tu i pundaun na karamapim rot. Dispela rot em wanpela bikipela haiwei insait long kantri na i save givim helpim long planti manmeri long Momase na Hailans rijon. Na sapos no gat wok i kamap long stretim dispela rot, bai dispela bikipela haiwei i lus.

Ripot i kam long Provinsal Dipatmen bilong Woks long Madang i tok olsem ol i painim taim long stretim, long wanem, ren i no givim sans long ol, na ol i wok long traim yet long stretim olgeta samting.

Wanpela eria long dispela haiwei

we i bungim bikipela birua tru em rot klostu long Kawarwar maket. Long dispela hap, bai yu lukim olsem graun i pundaun i kam daun long maunten na i laik rausim ol traipela diwai, na tu ol buai na kakau gaden.

Taim graun i pundaun, em i karamapim planti hap bilong rot, na rot i kamap liklik tru inap long 5 mita tasol. Dispela i mekim na ol bikipela kar i painim taim long pinisim ran bilong ol.

Ramu NiCo Kampani i wok long traim long stretim dispela rot, long wanem, 135km paiplain bilong ol i stap klostu long dispela rot.

Tasol em i no wok bilong ol Ramu NiCo long stretim dispela rot. Em i wok bilong gavman.

Planti manmeri i kisim taim pinis long dispela bagarap i kamap long rot na ol i laikim provinsal o nesanel gavman i mas lukluk long dispela hevi na stretim hariap.

**OL Luteran Sios Kote Distrik long Finsafen, Morobe Provins i singsing paitim kundu long soim amamas bilong ol long kisim 2016 bikipela sinod bung bilong sios. Ples Simbang long Finsafen i namba wan ples we ol Luteran misinari bilong Germani i bin krugutim na planim Tok bilong Bikipela long 1886. Na ol bin holim namba wan sinod we i go long olgeta hap bilong Papua Niugini. Ol sios district i holim na lukautim na ranim ol wok bilong sios.**

## CIC helpim gut ol rurel fama

**James Kila i raitim**

CIC Freit Surti Program i helpim ol fama husat i stap longwe.

Wanpela program bilong Kopi Industri Koporesen (CIC) i wok gut stret long helpim ol rurel famas husat i save hatwok long painim trenspot long bringim kopi bilong ol i go long maket long salim na kisim mani.

Dispela program ol i kolim Freit Surti Program CIC i helpim gut ol fama bikos aninit long dispela helpim, ol fama bai baim 60 pesen

long transpot long karim kopi bilong ol i go long maket na arapela 40 pesen em CIC i baim aninit long dispela program.

I no long taim i go pinis ol lain famas bilong Tapen long maunten bilong Raikos distrik long Madang i bin bringim 150 beg drai kopi bilong ol i go long Madang long sip, na bihain CIC i bringim ol trak bilong en long kisim ol kopi beg i go antap long Goroka na prosesim na salim bilong ol lain fama ya aninit long grup maket.

Dispela helpim bilong CIC i go

long ol fama long ol longwe o rurel ples husat i save painim taim long transpot i mekim ol i amamas tru.

Siaman bilong Awanas Kopretiv Sosaiti long Tapen, Nelson Waset i tok olsem ol fama bilong em long ples i amamas long gutpela helpim CIC i givim ol bikos, ol yet bai painim hat tru long bringim kopi i go long maket na prosesim na salim. Tasol helpim bilong CIC i lukim ol i bringim kopi long sip i go long Madang na bihain kopi i go antap long trak we em fri tasol na trak bilong CIC i karim i go long Goroka long prosesim na salim.



Ol wokman bilong Kopi Industri Kopresen (CIC) long Aiyura redim kar long Madang long karim ol kopi beg bilong ol fama bilong Tapen i go long Goroka. Foto James Kila



Roses are red  
The sky is blue  
Come fly our way  
To somewhere new

**CELEBRATE  
VALENTINES  
WITH OUR  
LOW FARES**

Buka	↔	Kavieng	K 460
Goroka	↔	Mt. Hagen	K 209
Goroka	↔	Tabubil	K 509
Goroka	↔	Kiunga	K 529
Kimbe	↔	Madang	K 499
Lae	↔	Buka	K 479
Lae	↔	Goroka	K 209
Lae	↔	Alotau	K 499
Lae	↔	Kavieng	K 399
Lae	↔	Popondetta	K 319
Port Moresby	↔	Buka	K 519
Port Moresby	↔	Kimbe	K 339
Port Moresby	↔	Kavieng	K 449
Port Moresby	↔	Madang	K 349
Kokopo	↔	Buka	K 279
Kokopo	↔	Kavieng	K 249

PORT MORESBY - Level 1, Pacific Place 321 3400  
- Vision City 7373 4250

MT. HAGEN - Central Highlands Printers 542 0662  
- Kagamuga Airport 542 2732

LAE - Micro Bank Haus, Fifth Street 479 5980

POPONDETTA - Top Town (opposite Memorial Park) 629 7638  
- Preston White Street 641 1288

ALOTAU - Airport 532 2532

GOROKA - Airport 649 9171

TABUBIL - Airport 649 1125

KIUNGA - Airport 422 0011

MADANG - Global Travel 983 4409

KIMBE - Travel Line Ltd 982 1999

RABAU - Rabaul Hotel 982 1999

Fares are one way and for travel between 4th February and 28th February, 2014. Booking period is between 4th to 14th February, 2014. No advance purchase. Normal fare class rules apply. Seats are limited.

**CALL US ON 7222151**  
or go to **www.apng.com**

Airlines PNG





# Pilai long wet na drai sisen

**P**APUA Niugini gat tupela kain sisen bilong graun – wanpela em drai na narapela em ren o wet sisen.

Long dispela as, ol gem bilong yumi tu mas redi long kamap insait long dispela tupela sisen.

I gat taim bai sampela gem i no inap kamap bilong wanem ren i bikpela tumas na pilai graun i bagarap.

Sampela taim bai san i strong na kilim ol-geta gras na mekim graun i strong tru we yu inap kisim bagarap sapos yu pudaun antap long en.

Ol spot we i save kamap insait long ol bikpela haus o kot i no save wari tumas long dispela tasol ol lain husat i save kilim skin long autsait long ol bikpela pilai graun i mas redi long dispela.

Wok redi bilong ol long i mas stat long trening taim yet.

### Trening bilong ren na wet

Long PNG, taim bilong ren na wet i save kamap long stat na pinis bilong yia olsem na yumi ol spotsmanmeri tu i mas save na redi long en.

Nambawan ples bilong redi long dispela em long taim bilong trening, long of-sisen na i go insait long trupela sisen wantaim.

Planti taim, yumi no save laik go long trening taim i gat bikpela ren, em i orait tasol yu mas tingim tu olsem sampela ol gem bilong yu bai kamap insait long rent u.

Ol kosa na trena i noken kros tumas sapos ol pilaia bilong yu i no kam trening long taim bilong ren bilong wanem ol i gat wanwan as long wanem na ol i no kam.

Sampela i ken stap longwe tru, sampela i tingim long pinis bilong trening bai ol i kam bek long haus olsem wanem sapos ren i mekim na ol PMV pinis wok hariap long avinun.

Na planti kain ol liklik samting olsem.

Wanpela rot long stretim dispela em long mekim olsem, sapos ren i bikpela tumas orait i gutpela long yupela i noken trening.

Sapos liklik ren tasol i pundaun orait, yupela i ken ron yet.

Yu olsem kosa i mas tingim tu olsem, ol pilaia bilong yu i ken kisim bagarap long trening tu sapos ol lek bilong ol i wel long graun i gras na ol i pudaun krangki.

Ol i ken kisim sik tu long kol bilong ren na lusim trening na gem longpela taim.

Sapos yu gat wanpela trening ples we i gat ples bilong waswas na tenis bihain long trening em bai orait.

Antap long dispela, ren bai mekim trening i hat na bai kros nating long ol pilaia long ol i no ron, sanap o holim bal gut – tasol em i no asua bilong ol.

Dispela em sampela ol sampela samting yu mas tingim na redi long en bipo yu tok-save long tim bilong yu olsem yupela bai gat trening long taim bilong ren o nogat.

Olsem mi tok pinis, wanpela samting yu ken mekim em long trening sapos ren i no bikpela tumas, dispela bai givim gutpela salens long ol pilaia na i no inap bagarap trening bilong ol tumas.

Sapos yupela i trening yet na ren i pundaun namel long trening, em i orait, yu ken ron liklik na pinis na go long haus.

### Pilai insait long ren

Long PNG, planti taim ol gem i no save kamap sapos i gat bikpela ren tumas.

Dispela em bilong wanem ol pilai graun bilong yumi nogat gutpela rot bilong wara i bihainim na i go aut na planti taim graun i save bagarap na pilai bai hat.

Tasol i gat sampela taim we gem i save

kamap yet.

Long dispela taim, em i gutpela long kamap wantaim wanpela kain pilai we bai helpim tim long i gat moa sans long skoa agensim narapela tim.

Yu mas tingim wanem kain ol samting bilong pilai we yu ken werim long pilai long taim bilong ren we i ken helpim yu gut.

### Trening long taim bilong san na drai

Long drai sisen, i nogat planti hevi tumas i save kamap long trening.

Wanpela samting yu mas tingim em long i gat planti wara bilong dring bilong wanem ples i save hat tru long dispela taim.

I mas i gat planti wara long taim bilong trening bilong wanem bodi bilong yu bai lusim bikpela wara olsem tuhat taim yu trening na ai bilong yu i ken raun, bai yu sotwin na i nogat strong tu sapos yu no kisim inap wara.

Kosa, yu noken givim planti strongpela trening we bai mekim ol pilaia bilong yu i pudaun strong long graun bilong wanem ol i ken kisim bagarap long dispela.

Long drai sisen, planti ol gras i save dai na graun i save go strong tru olsem na lukaut long dispela.

Sapos ol gutpela pilaia bilong yu i kisim bagarap long trening bai husat i kisim ples bilong ol long pilai long taim bilong gem?

Tingim dispela ol samting long helpim yu redi long pilai long drai sisen.

### Pilai bilong drai sisen

Olsem long trening, i mas i gat planti wara bilong ol pilaia long taim bilong gem tu.

Dispela em i bikpela samting bilong wanem, ol bai pilai strong moa long taim ol i stap long trening bilong wanem ol i gat narapela tim i stap long pilai graun nau olsem birua.

Namba tu samting em long i gat ol marasin na liklik karamap bilong pasim sua bilong wanem ol pilaia bai kisim sampela kain bagarap long skin bilong wanem graun i hat na strong na tu ol narapela tim bai traim long givim pen long ol.

Na wankain olsem long ren sisen, yu mas painim ol samting bilong pilai we bai helpim yu long ron na pilai gut long drai sisen.

Yu ken ting olsem dispela em ol liklik samting tasol ol i ken helpim tim bilong yu i redi gut na bai yu lukim ol i soim gutpela mak long taim bilong trening we ol bai karim i go insait long gem wantaim.

Trening hat na lukim yu long wik i kam.



**REN GEM:** Wanpela ragbi lig gem namel long Vipers na Eagles long Mosbi. Em i orait long pilai sapos ren i no bikpela tumas.



**PILAI LONG WARA:** Ol pilaia i painim hat long ronim bal gut insait long wanpela soka gem long Morobe provins.



**NOGAT GEM:** Wanpela man i lukluk long pilai graun nating long Mosbi Soka Asosiesen taim bikpela ren i mekim ol ofisol i stopim gem long kamap.



# PNG Hanta kisim sapot long intanet

Isaac Liri i raitim

SAPOS yu i gat wanpela ogenaisesen o kampani long dispela taim bilong teknoloji, yu nidim intanet long helpim yu long kisim sapot na mekim wok bilong yu i ran gut.

PNG Hanta ragbi lig klap i gat websait na fesbuk pes pinis, na dispela i bin kamap long las wik taim Colony Grup i helpim ol PNG Hanta long kamapim dispela websait na fesbuk pes. Colony Grup em wanpela ogenaisesen we i save helpim ol ara-

pela ogenaisesen long kamapim websait.

Astingting bilong kamapim dispela websait na fesbuk pes em long maketim tim, na tu kisim tingting bilong ol sapota na ol manmeri insait na autsait long kantri.

Taim fesbuk pes bilong ol Hanta i bin kamap laiv long intanet long las wik, 4000 manmeri i bin lukim na laikim, na dispela i mekim menesmen bilong ol Hanta tu i amamas tru.

Wok long kamapim dispela Websait na fesbuk pes i bin stat long las mun, na

Colony Grup wantaim Papua Niugini Ragbi Futbal Lig (PNGRFL) i wok bung yet long mekim dispela websait na fesbuk pes long kamap gut.

"Mi amamas long lukim olsem klap i gat wanpela websait, na mi gat bilip olsem dispela websait bai helpim mipela ol menesmen long planti samting," Arnold Krewanty Tim Menesa bilong ol Hanta i tok.

Long websait na fesbuk pes bilong ol Hanta, olgeta nius, poto, dro, tiket prais na tu profail bilong ol pilai i

stap.

Kosa bilong ol PNG Hanta, Michael Marum i tok em i amamas tru long dispela websait long wanem em bai helpim klap long kisim planti sapot insait long kantri, na autsait long kantri tu.

Taim *Wantok Niuspepa* i askim ol yangpela manmeri husat save yusim Fesbuk long tingting bilong ol long dispela websait na fesbuk pes, ol i tok em i gutpela, long wanem, sapos ol i no watsim gem long TV, ol bai kisim nius na lukim ol risal long websait o fesbuk pes.

## Ol komyuniti long PNG mas redi long Pasifik Gems

Isaac Liri i raitim

PLANTI toktok long redi long 2015 Pasifik Gems i kamap pinis long nius, na Pasifik Gems Ogenaising Komiti (GOC) i wok strong yet long redim ol komyuniti insait long kantri bipo long 2015 Pasifik Gems.

Siameri bilong GOC, Emma Waiwai i tok las mun olsem sapos ol komyuniti i no redi long dispela bikpela pilai, dispela Pasifik Gems i no inap kamap gut, na kantri bai kisim nem nogut, na i no GOC tasol.

GOC tim i wok strong long mekim komyuniti awenes long olgeta komyuniti insait long kantri na tok save long ol long gutpela bilong dispela Pasifik Gem. Tasol GOC i nidim helpim bilong ol arapela kampani,



Ol memba bilong Kaugere komyuniti long Pot Mosbi long wanpela komyuniti awenes program i soim sapot bilong ol long 2015 Pasifik Gems.

media na tu ol lida long wan wan komyuniti long helpim ol long mekim ol wok bilong komyuniti awenes bilong 2015 Pasifik Gems.

"Pasifik Gems i no bilong ol spot manmeri na sapota

bilong spot tasol, em i bilong olgeta manmeri insait long wanwan komyuniti long kantri. Pasifik Gems bai i bringim planti mani i kam insait long kantri na strongim ekonomi bilong

Papua Niugini," dispela em hap tok bilong Minista bilong Spot, Justin Tkatchenko, long olgeta taim em i bung wantaim ol nius ripota long toktok long Pasifik Gems.

## CEO ripot long wok redi bilong Pasifik Gems



Sif Eksekyutiv Opisa (CEO) bilong Pasifik Gems Ogenaising Komiti (GOC) i toktok wantaim Pasifik Ailans Nius Asosieisen long Noumea, Nu Kaledonia.

SIF Eksekyutiv Opisa (CEO) bilong 2015 Pasifik Gems Ogenaising Komiti (GOC), Peter Stewart i stap long Nu Kaledonia long dispela wik long toktok wantaim Pasifik Ailans Nius Asosieisen long namba tri bung bilong ol.

Long dispela bung, Mista Stewart i tokaut long ol wok redi GOC i wok long mekim

long Papua Niugini.

"Dispela pilai em i wanpela bikpela samting long Papua Niugini, na ol wok redi i ran gut tasol. Bikpela tingting bilong mipela long GOC em long mekim dispela ol pilai i kamap gut. Dispela i hatwok tru tasol mipela i wok strong long wanem, mipela laik lukim olgeta samting i

kamap stret," Mista Stewart i tok.

Mista Stewart i tok GOC i no inap long lukim gutpela risal sapos ol i no wok bung wantaim gavman. Na long lukluk bilong em wantaim ol GOC memba, gavman i soim bikpela sapot, na ol i amamas long dispela.

Em i tok ol kampani tu

husat i stap olsem ol spona bilong Pasifik Gems i soim bikpela sapot, na GOC i amamas long kisim sapot bilong ol, na wok bung wantaim ol.

Namba wan spona bilong Pasifik Gems em Bank South Pacific (BSP), na BSP i sanap baksait long GOC long olgeta wok bilong en.

*- Weekend sofbal dro -*

**SEASON PROPER -  
ROUND TWO, GAME SEVEN**

Saturday, 15th February 2014

TIME	TEAMS	TEAMS	GRADE	REMARKS
8:00 - 9:00	SOCCERS			Tesbul
9:00 - 10:00	Songerr Wobles 1	Songerr Wobles 2	2/3	
10:30 - 11:30				
11:30 - 12:15	SOCCERS	ADMIRALTY	A	
12:15 - 13:30	SOCCERS	FORORDS	A	
13:30 - 14:45	SOCCERS	ADMIRALTY	A	
14:45 - 16:00	SOCCERS	FORORDS	A	
BYE	WANTOKS A & B			

TIME	TEAMS	TEAMS	GRADE	REMARKS
8:00 - 9:00	SOCCERS			Tesbul
9:00 - 10:00	NSC	ADMIRALTY SOCCERS	2/3	
10:30 - 11:30				
11:30 - 12:15	CHEERU	UNITED SISTERS	A	
12:15 - 13:30	STANGORZ	BEARS	A	
13:30 - 14:45	CHEERU	UNITED SISTERS	A	
14:45 - 16:00	STANGORZ	BEARS	A	
BYE	WANTOKS A & B			

TELKOM NATIONAL SOCCER LEAGUE

Round (1) Points Ladder

Teams	P	W	L	D	B	Pts
1. Morobe United	1	1	0	0	0	3
2. Hekari United	1	0	0	1	0	1
3. Eastern Stars	1	0	0	1	0	1
4. Oro FC	1	0	0	1	0	1
5. Admiralty	1	0	0	1	0	1
6. Lae FC	1	0	1	0	0	0
7. Besta	0	0	0	0	1	0

## Ol Stars i lokim Hekari long NSL

Isaac Liri i raitim

BIHAIN long trail gem bilong ol Hekari wantaim ol Admiralty las wik, ol Hekari i bin soim olsem ol i strongpela tim insait long kompetisen taim ol i winim Admiralty 3-0.

Tasol long namba wan gem bilong ol Hekari wantaim ol Isten Stars long Sarere, ol Hekari i painim taim long winim dispela opening gem, na skoa long ful taim i bin stap 1-1.

Hekari i bin gat planti

sans long skoa tasol difens bilong ol Isten Stars i bin strong tumas.

Kosa bilong ol Hekari Yunaitet Jerry Allen i tok em i no amamas tumas wantaim dispela risal tasol em i gat bilip olsem ol mangi bilong em bai lukim ol asua ol i mekim long dispela gem, na pilai gut long namba tu raun.

Long ol arapela gem, Morobe FC i winim Lae FC long 3-0, Oro FC i dro wantaim Admiralty FC 1-1 na Besta i bin stap long bai.





(Lephan i go Raithan) Silva Medalis, Rasia, Albert Demchenko; Gold Medalis, bilong Jemani, Felix Loch; na Brons Medalis, bilong Itali Armin Zoeggeler, i selebret antap long podium bilong ol Man, Lug Singles Flawa Sere-moni long Sanki Sliding Senta long Sochi Winta Olimpiks long Februeri 9, 2014.

# Sochi Winta Olimpik Gem long Rasia

*Olgeta poto i kam long ABC netwok*



Long de namba 3 stat bilong en, Daniel Greig bilong Australia i pundaun long 500-mita spit sketing long Sochi Ais Olimpiks 2014 long Adler Sketing Senta long Februeri 10, 2014.



Gold medallist bilong Frans Martin Fourcade selebretim win bilong ol Man Biathlon 12,5 km skeit long Laura Kross-Kantri Ski na Biathlon Senter long Sochi Winta Olimpiks long Februeri 10, 2014 long Rosa Khutor klostu long Sochi.



Carina Vogt bilong Jemani selebretim namba wan win bilong em long ol meri ski jump Olimpik gol.



Mathia Mayer bilong Austria i plai antap na abrusim mak na go daun long alpain ski bilong ol man long Rosa Khutor Alpain Senta long Februeri 9, 2014.

# Ol spot eksen poto long wiken...

*Ol Poto Nicky Bernard.*



**RANAWE:** Pilaia bilong Uni i lusim tupela narapela pilaia bihain taim ol i pilai long ragbi yunien 7 pilai bilong ol long wiken long Mosbi.



Mary Nanu bilong Admiralty i ketsim bal stret long glab bilong em long pilai bilong ol meri sofbal long Pot Mosbi.



**LONGPELA SUTA:** Gol Suta bilong Westpac i sanap tasol na ketsim dispela bal taim Gol Kipa bilong Datec i kalap long rausim bal. Datec i winim dispela pilai bilong ol meri Praivet Kampani.



**MI SEV:** Pilaia bilong Gazelle i apim han go antap long toksave olsem em i seif tasol pilaia bilong Brothers i strongim kona olsem em autim em long pilai bilong A gret sofbal pilai bilong ol man long Bisini long Mosbi.



**BIHAIN PITSA:** Dispela yangpela mangi bai kamap pitsa bihain na bai kamap wanpela gutpela pilaia bilong PNG. Em save bihainim papamama bilong em go long Sofbal pilai long Bisini olgeta wiken na em i save pinis long we bilong pilai sofbal.

**TOKSAVE:** Salim ol spots dro bilong yu kam long Feks; 325 2579, e-mel;[bveo@wantok.com.pg](mailto:bveo@wantok.com.pg) o kam lusim long Wantok Niuspepa opis long Able Building Complex long Central Waigani, NCD.



*Moa oil na meat insait*

**TUNA IN OIL**

## OI PNG Hanta winim trail gem

Isaac Liri i raitim

OI PNG Hanta i soim trupela kala bilong Papua Niugini ragbi lig taim ol i winim namba wan trail gem bilong ol egensim Northern Pride long Barlow Park long Kens, Australia.

Northern Pride em ol maina premia bilong Intrust Supa Kap long las yia, na long ol Hanta long kamap wantaim wanpela win long namba wan trail gem bilong ol egensim ol maina premia bilong las yia, i soim olsem Papua Niugini i fit long pilai insait long Intrust Supa Kap.

"Ren i pundaun, na ples bilong pilai i gat wara, tasol ol mangi bilong yumi i no bisilong ren na pilai strong wantaim spirit bilong ragbi lig. Dispela trail gem i bin wanpela strongpela gem, na bihain long 70 minit bilong gem, mipela bin ting bai mipela i lus taim skoa i bin stap olsem 18-14.

Bikpela tok tenk yu na amamas i go long ol mangi



Wanpela Hanta i brukim difens bilong ol Northern Pride. OI Hanta i win 26-18.

long wanem, ol i no bin givap. Ol mangi i bin soim stret olsem ol i laik stap insait long dispela kompetisen," Het kosa Michael Marum i tok.

I bin gat 10 minit tasol i

stap long klok na fulbek bilong ol Hanta Adex Wera i skoim wining trai, na Israel Eliab i skorim narapela ken long mekim fainel sko i stap 26-18.

Israel Eliab i bin kisim

ples bilong Mark Mexico na stap olsem kepten long dispela trail gem long wanem, Mark Mexico i kisim bagarap na ol dokta tokim em long malolo.

Dispela trail gem tu i bin

lukim planti Papua Niugini manmeri long Australia i amamas na sapot. Ol i amamas long lukim wanpela Papua Niugini tim i karim nem bilong kantri na pilai long Australia.

**Stars lokim Hekari**

**- Pes 25**

**Wol spot poto**

**- Pes 26**

**OI spot poto**

**- Pes 27**

## Johnston's Pharmacies Ltd

**Baby Products**



P.O. Box 1066 Boroko  
 Phone: 325 3185, Fax: 325 0190  
 Email: sales@johnstons.com.pg